

## **YOHAN** **é Gabú Danglù Laiká** **(The Gospel of John)**

*Haù Mungdang, Xângzo Byù Gùng Lé Dut É Hkyô*

<sup>1</sup> A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri.

<sup>2</sup> Yhang gi, a-nham sâng-hi má, Garai Gasang eq rahá nghut nyi ri.

<sup>3</sup> Nyi mi-nyì, joq mijoq gi, Yhang dông mai hpan tô é chyat nghut lhê; Yhang dông mai a hpan é gi, haì lhang a joq nghut ri.

<sup>4</sup> Asak chyungxe gi, Yhang má nghut lhê mù, asak haù gi, byu pè é matú maubó nghut ri.

<sup>5</sup> Haù maubó gi, mauchut má duqbó byì nyì kôlhang, mauchut gi, haù lé a hap yù nghut ri.

<sup>6</sup> Garai Gasang mai nhang kat é, Yohan gâ é byù rayuq jé lé ri.

<sup>7</sup> Yhang gi, maubó haù eq sêng é hkyô lé, saksé hkám byì luí, yhang é yanmai byù lhunglhang bang wó lumjínkó sháng gaq ga, saksé rayuq dông jé lé é sù nghut ri.

<sup>8</sup> Yhang gi, haù maubó a nghut; maubó haù lé saksé hkám byì râ matú za sheq jé lé é ru nghut lhê.

<sup>9</sup> Byù yuq jup lé duqbó byì é, maubó akying haù gi, mingkan htoq má jé nyi to bê.

<sup>10</sup> Yhang gi, mingkan htoq má nyi to bê nghut ri; mingkan lé gi, Yhang dông mai hpan tô é nghut

kôlhang, mingkan haû gi, Yhang lé a wú sé nghut ri.

<sup>11</sup> Yhang gi, yhumsîng mau má jé lé kôlhang, Yhâng é amyû pé gi, Yhang lé a lhom hap yù kó nghut ri.

<sup>12</sup> Nghut kôlhang, Yhang gi, Yhang lé lhom hap yù luî, Yhâng é myîng lé lumjîng é bang lhunglhang lé, Garai Gasâng é yhangzô pé dut râ ahkáng byi bê nghut ri.

<sup>13</sup> Haú bang gi, sui sho dông hku kat é le a nghut, byù ô nau é dông hku kat é le a nghut, gungsho ô nau é dông hku kat é le a nghut e za, Garai Gasang chyáng mai hku kat é bang ru nghut lhê.

<sup>14</sup> Haû Mungdang gi, xângzo byù gùng lé dut luî, ngamoq chyáng nyi wú bê nghut lhê. Ngamoq gi, haû jeju eq tengmán hkyô byîng tô é, Yhang é hpungwup shingkang lé myang wú bê nghut lhê; haû gi, haû Îwâ é zote rayuq dông, Yhang wó yu é hpungwup shingkang nghut ri.

<sup>15</sup> Wui-myhup Sará Yohan gi, Yhang eq sêng é hkyô lé saksé hkâm é hkûn, garû taî é gi, "'Ngá é htâng má jé lé é Sû gi, ngá é hí mai nyi to bê sù nghut é yanmai, ngá htoq je gyaú sù nghut ri.' nghû, ngò taî é sù gi, shí yuq nghut bê." gâ ri.

<sup>16</sup> Yhâng é gumjup é jeju ahkaû mai, nga-nhúng banshoq bang gi, shimân jeju lé ralhûm htoq ralhûm myang yu nyi bê nghut lhê.

<sup>17</sup> Hkâsu mù gâ lé, haû jep é tarâ gi, Mosheq é loq dông mai byî é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê.

<sup>18</sup> Garai Gasang lé, ó yuq èq le a myang wú wú

é nghut lhê; nghut kôlhang, haû Îwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

*Wui-myhup Sará Yohan Hko Kyô É Hkyô*

*Mht 3:1-12; Mrk 1:1-8; Luk 3:15-17*

<sup>19</sup> Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkûn, Yohan saksé hkâm é gi, a-ô mâ é hkyô pé nghut ri.

<sup>20</sup> Yhang gi, a hê a zaú tô e za, "Ngò gi, Hkrisduq\* a nghut." ga lhom taí kyô ri.

<sup>21</sup> Haú hkûn, yhangmoq gi, "Haû nghut jáng, nàng gi, ó yuq nghut lhê lhú? Nàng gi, Eliyaq lhú?" ga myi kôjáng, yhang gi, "A nghut." ga taí ri; "Nàng gi, haû Myiqhtoi nghut lhê lhú?" ga dum myi kôjáng, yhang gi, "A nghut." ga tû taí ri.

<sup>22</sup> Haû mù, yhangmoq gi, "Ngamoq lé nhang kat bâng chyáng ló wó taí kyo râ matú, nàng gi, ó yuq nghut lhê lhú? Náng gùng lé nàng hkâsu nghû lhê lhú? Taí kyô wú laq." ga dum myí akô.

<sup>23</sup> Haú hkûn, Yohan gi, myiqhtoi Esai-aq é dang eq rajung za, "Ngò gi, haû yoso má, 'Yhumsing é matú hkyô lhoq nyhang to keq.' gâ é htê lé, garû taí é sù nghut lhê." ☆ ga tû taí ri.

<sup>24</sup> Hparishe pé mai nhang kat é bang ra-am gi, yhang lé,

<sup>25</sup> "Nàng gi, haû Hkrisduq le a nghut, Eliyaq le a nghut, Myiqhtoi le a nghut é nhîng, haî mù luî, wui-myhup hkâm byi nyi lhê lhú?" ga dangmyi myí akô.

\* **1:20** Grik dong *Hkrisduq* gâ é gi, xû but hui Sû gâ é lichyúm nghut mù, Hebre dong "Mesaia" gâ é eq rajung za nghut lhê. ☆ **1:23** Esai 40:3

26 Haú hkûn, Yohan tû taí é gi, "Ngò gi, wui èq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tó ri.

27 Yhang gi, ngá htâng má lé é sù yuq nghut bê; ngò gi, Yhâng é hkyî-tsung tui lé hpyî râ lhang a gingdán é nghut ri." gâ ri.

28 Shí pé banshoq gi, Yohan wui-myhup hkám byî nyi é, Yodan làng hé hpoq mâ é Behtani wà má dut é hkyô pé chyat nghut ri.

### *Yesuq Gi, Garai Gasâng É Sauzo Nghut É Hkyô*

29 Hau htang nyí, Yohan gi, yhâng chyáng Yesuq lé lo nyi é lé myàng luí, taí é gi, "Mingkan byu pé é yubak mara lé yu pyám byî é Garai Gasâng é Sauzo lé, wú keq!

30 Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghû, ngò taí é sù yhang nghut bê.

31 Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghû, ngò lé jé mù, wui èq wui-myhup hkám byî nyi é nghut lhê." gâ ri.

32 Hau htâng, Yohan saksé hkâm é gi, "Haú Woi-nyí gi, mauhkûng mai hpûngkyui gunghkyâng sù é dông mai gyó lé mù, Yhâng chyáng lé nô tô é lé, ngò myàng ri.

33 Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi râ matú, ngo lé nhang kat é Sù, ngo lé taí kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkám byi râ sù nghut lhê.' gâ ri.

34 Haû eq rajung za ngò myàng bê nghut luî, shí yuq gi, Garai Gasâng é Yhangzo nghut lê nghû, ngò saksé hkâm lê." gâ ri.

### *Sâng-hi Lê É Chángzô Pé*

35 Hau htang nyí, Yohan gi, yhâng é chángzo í yuq eq rahá, haú má dum nyi tô akô.

36 Haú hkûn, yhang gi, Yesuq laí ló nyi é lé myang kat jáng, "Hê, Garai Gasâng é sauzo lé, wú keq!" ga taí kat ri.

37 Chángzo haû í yuq gi, yhang haû su gâ é lé wó gyo kôjáng, Yesuq é htâng cháng bekô nghut ri.

38 Yesuq gi, lhing wú kat le, yhangnhik châng tô é lé myàng luî, "Nungnhik haí o akô l hú?" ga myi jáng, yhangnhik gi, "Rabai ê, Nàng hkâmá nyi lê l hú?" ga taú myí kat akô nghut ri. (Rabai gâ é gi, Sará gâ é lichyúm nghut lê.)

39 Haú hkûn, Yhang gi, "Lé keq, haú jáng, nungnhik myàng kó râ nghut lê." ga tû taí ri.

(Haú-u gi, raxê hkyíng<sup>†</sup> kô nghut ri.) Haû mù luî, yhangnhik gi, châng ê mù, Yhang hkâmá nyi é lé, ê myàng kôluî, haú nyí buigyùm shoq, Yhang eq rahá ê nyi nyi akô nghut ri.

40 Yohan taí é dang lé wó gyo luî, Yesuq htâng châng é su nhik mâ é rayuq gi, Simun Petruq é yhanggu Andre nghut ri.

41 Andre gi, yhangmang Simun lé hí myàng luî, "Nga-nhik gi, Mesaia lé myàng bê." ga yhang lé taí kyô ri. (Mesaia gâ é lichyúm gi, Hkrisduq gâ é nghut lê.)

<sup>†</sup> 1:39 Raxê hkyíng gi, myinhâng myi hkyíng záng ri.

42 Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa<sup>‡</sup> gâ é myìng lé, nàng wó yû râ nghut lhê." ga tâi ri. (Kehpa gâ é lichyúm gi, Petruq gâ é nghut lhê.)

*Hpilip Eq Nahtanelaq Lé Hkyin Yu É Hkyô*

43 Hau htang nyí, Yesuq gi, Galile mau shut ê râ matú, myit hpyit yû bê nghut ri. Yhang gi, Hpilip lé myàng jáng, "Ngá htâng cháng aq." ga tâi ri.

44 Hpilip gi, Andre eq Petruq nhik nyi é Bet-saida wà mó mã é byù nghut ri.

45 Yhang gi, Nahtanelaq lé myàng jáng, "Mosheq mai tarâ laiká má kê tô é eq myiqhtoí pé mai le lhoq ang luí kê tô é sù, Yosep é yhangzo, Nazaret wà byù Yesuq lé, ngamoq myàng bê." ga yhang lé tâi kyô ri.

46 Haú hkûn, Nahtanelaq gi, "Nazaret wà ô! Haú mai, ge é jung haí wa wó htoq lhê lhú?" ga myi jáng, Hpilip gi, "Ru lé wú aq." ga yhang lé tâi ri.

47 Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byù akying rayuq nghut ri." ga tâi ri.

48 Haú hkûn, Nahtanelaq gi, "Nàng, ngo lé hkâsu kut sê é lhú?" ga myi jáng, Yesuq gi, "Nang lé, Hpilip èq a wut yù shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê." ga tû tâi ri.

---

<sup>‡</sup> 1:42 Aramaik dang đông *Kehpa* gâ é eq Grik dang đông "Petruq" gâ é lichyúm gi, luqgok gâ é nghut lhê.

<sup>49</sup> Haû mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pê é Hkohlâm le nghut ri." ga taî ri.

<sup>50</sup> Haú hkûn, Yesuq gi, "Ngò, nang lé, maihpáng gâm ô má myang é nghû taî kyô é yanmai, nàng lumjíngh lê a nghut lúh? Hau htoq je kô é muzó pé lé, nàng myàng râ nghut lhê." ga taî ri.

<sup>51</sup> Hau htâng, Yesuq xoq taî é gi, "Ngò, nungmoq lé teng za taî kôlé, mauhkúng bóng lô luî, haû Byu Yhangzô ahtoq má, Garai Gasâng é maumang lagyô pé doq lô gyó lô kut nyî kô é lé, nungmoq myàng kó râ nghut lhê." gâ ri.

## 2

### *Wuì Lé Tsibiyiq Wing Dut Nhang É Hkyô*

<sup>1</sup> Hau htâng, í nyí nghû râ nyí má, Galile mau má é Hkanaq wà mó má, myiháng poî ralhúm joq ri. Haû má Yesuq é yhângnu le, bo lom ri.

<sup>2</sup> Yesuq eq Yhâng é chángzô pé lé le, myiháng poî haû má jì akô nghut ri.

<sup>3</sup> Tsibiyiq wing jaú tûm to kô é hkûn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé taî ri.

<sup>4</sup> Haú hkûn, Yesuq gi, "Ânu ê,\* haû, nàng gi, Ngò eq haî sêng lhê lúh? Ngá é ahkyíng a jé shi é nghut lhê." ga tû taî ri.

<sup>5</sup> Nghut kôlhang, Yhâng nu gi, haû dui-nhâng zoshâng wuì lé, "Yhang haî taî le, haî kut keq." ga taî ri.

---

\* **2:4** Ânu ê gâ é lé, Grik đông gi, "Myiwe myhí ê" ga bo tô é nghut lhê.

<sup>6</sup> Haû nàm má, í sum xê galan kô wang é luqgok wúng hkyuq cham joq tô ri; haû gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

<sup>7</sup> Yesuq gi, haû dui-nhâng zoshâng wuì lé, "Wúng haú pé má wuì lhoq pyíng keq." ga tâi ri; haû mù, yhangmoq gi, wúng haú pé má byíng shoq shoq lhoq pyíng bekô nghut ri.

<sup>8</sup> Hau htâng, Yhang gi, yhangmoq lé, "Ahkuî, ratsuí hkû yù mù, poi-up lé yu ló byi keq." ga tai jáng, yhangmoq gi, yu ló byi akô nghut ri.

<sup>9</sup> Poi-up hpó gi, wuì mai dut é tsibiyiq wing haû lé, shuq chyam wú ri; wuì hkam é dui-nhâng zoshâng wuì gi, tsibiyiq wing haû hkâmai lo é hkyô lé sê to kôlhang, yhang gi, a sé nghut ri. Haû mù, yhang gi, lusik lé, ji yù luí,

<sup>10</sup> "Yuq hkanmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuî jé shoq wó hkong tô ri-nhung!" ga tâi ri.

<sup>11</sup> Galile mau mâ é Hkanaq wà mó má, Yesuq tân shit é limik kumlhá gi, Yhang kut é limik kumlhá pé mâ é sâng-hi dàm nghut ri. Yhang gi, Yhâng é hpungwup shingkang lé, haú đông lhoq htoq shit é nghut mù luí, Yhâng é chángzô pé gi, Yhang lé lumjíng bum akô nghut ri.

*Noqkuq Yhûm Lé Lhoq Sansêng Pyâm É Hkyô  
Mht 21:12-13; Mrk 11:15-17; Luk 19:45-46*



12 Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um và má gyó ló ri; yhangmoq gi, haú má buinyì myi ngò nyí nyi akô nghut ri.

13 Yudaq byu pé é Lhoqlhai Poí jé râ nghut é hkûn, Yesuq gi, Yerusalem và mó má doq ló ri.

14 Haú hkûn, noqkuq yhûm wàng má, nojûng, sau, hpûngkyui pé lé ûng nyi é bang lé le, siboí má ngùn htaí zô zung nyi é bang lé le, Yhang ló myàng ri.

15 Haú mù, Yhang gi, tui lé, nhuq râ wase saí yù mù, banshoq bang lé le, sau eq nojûng lé le, haú noqkuq yhûm wàng mai hkat htoq luí, ngùn htaí zo bâng é ngùn htingchap lé gi, tû hut pyám byi mù, yhangmoq é siboí lé gi, tu mhuc pyám byí ri;

16 haú hpûngkyui ung zô é bang lé le, "Zè shi pé lé yu htoq ló keq! Ngá Wá é yhûm lé, hpugá jowò hkâkut kó!" ga luí nhik-yô ri.

17 Haú mù, Yhâng é chángzô pé gi, "Ngò, Náng é yhûm lé chyitdap kâng tuí é hkyô gi, Ngo lé myi su nyhê jôm pyám râ nghut lhê." ☆ ga kê tô é lé, myit bún kat akô nghut ri.

18 Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tûn shit râ matú, ngamoq lé, haí jung limik kumlhá wó tûn shit râ lhú?" ga chôm myí akô nghut ri.

19 Haú hkûn, Yesuq gi, "Noqkuq yhûm shí lé nungmoq hpýoq pyám keq, sum nyí gyoro má, Ngò, haú lé dum tu shap râ nghut lhê." ga, yhangmoq lé tû tai ri.

---

☆ 2:17 Hkya-on 69:9

<sup>20</sup> Haû Yudaq byu pé gi, "Noqkuq yhûm shî lé, myi xe hkyuq zân tup saî é ru nghut lhê; sum nyí gyoro má za, Nàng wó tu shap râ lúh?" ga tu myí akô nghut ri.

<sup>21</sup> Nghut kôlhang, Yesuq taî é noqkuq yhûm gi, Yhâng é gùng lé lhoq ang luî taî é nghut ri.

<sup>22</sup> Haû mù, Yhang, shî é mai lhoq dui toq huî é hkûn sheq, Yhâng é chángzô pé gi, Yhang haû su ga taî é dang lé myit bun kômù, Chyúmdang lé le, Yesuq taî é dang pé lé le, lumjínng akô nghut ri.

<sup>23</sup> Haû Lhoqlhai Poî nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjínng bum akô nghut ri.

<sup>24</sup> Nghut kôlhang, Yesuq gi, byù lhunglhang bâng é myit lé sê é yanmai, yhangmoq chyáng, Yhânggùng lé a ap to nghut ri.

<sup>25</sup> Yhang gi, byu é i-myit unghkaû má haî lúng tô é lé sê é yanmai, byù yhangchang saksé hkám byí é a ra nghut ri.

### 3

#### *Nikodimu Lé, Yesuq Mhoqshit É Hkyô*

<sup>1</sup> Nikodimu gâ é Hparishe rayuq nyi ri; yhang gi, Yudaq byu pé é byìn tú wapdoq má bo é sù nghut ri.

<sup>2</sup> Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taî ri.

<sup>3</sup> Haú hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tû taí ri.

<sup>4</sup> Haû jáng, Nikodimu gi, "Ipyat kó bê é byù gi, dum hkû é hkâsu kut wó hui râ lhú? Înú é unghkaû má dum wàng mù, dum hku é hui râ gi, gè gè yhang wó dut râ a nghut!" ga taí ri.

<sup>5</sup> Haú hkûn, Yesuq gi, "Ngò, nàng lé teng za taí kyo lé, ó yuq nghut kôle, wuè eq Woi-nyí mai hku kat é hui sù za a nghut le gi, Garai Gasâng é mingdán má wó wâng râ a nghut.

<sup>6</sup> Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri.

<sup>7</sup> 'Nungmoq gi, dum hku é hui râ lhê' nghû Ngò taí é dang lé, nàng hkâmaú nyî.

<sup>8</sup> Haû, laì gi, yhang nau é shut ló lhê. Laì lò htê lé nàng wó gyo kôlhang, laì hkâmai lo é eq, hká shut ló é lé, nàng sé râ a nghut; haû Woi-nyí mai hku kat huí é sù, ó yuq nghut kôle, haû eq rajung za nghut lhê." ga tû taí ri.

<sup>9</sup> Haú hkûn, Nikodimu gi, "Haû gi, hkâsu wó dut râ lhú?" ga myî ri.

<sup>10</sup> Yesuq tû taí é gi, "Nàng gi, Israelaq byu pé é sará rayuq nghut to luí nhîng, haú hkyô pé lé a sê gyo lhú?

<sup>11</sup> Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri.

<sup>12</sup> Ngò gi, nungmoq lé, mingkan eq sêng é hkyô lé taí kyô le lhang, a lumjîng kô é nghut le gi,

mauhkûng mingdán eq sêng é hkyô lé taí kyô é nghut le gi, hkâsu kut wó lumjínng kó râ lúh?

<sup>13</sup> Mauhkûng mingdán mai gyó lo é sù, haú Byu Yhangzo mai lai luî, mauhkûng mingdán má ó yuq lhang wó doq ló wú é a nghut.

<sup>14</sup> Mosheq gi, yoso má lhangmuì lé tu shap tô é su, haú Byu Yhangzo le tu shap tô é hui ra râ nghut lhê.

<sup>15</sup> Haú mù, haú Byu Yhangzo lé lumjínng é yuq hkgangmó gi, ahtum abyuq é asak wó yú râ nghut lhê.

<sup>16</sup> Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjínng é sù ó yuq nghut kôle, htên byoq é a huí e za, ahtum abyuq é asak wó yú sháng gaq ga, rayuq za é Yhâng é Zote lé byí pyám bê nghut ri.

<sup>17</sup> Hkâsu mù gâ le, Garai Gasang gi, mingkan lé mara byi râ matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui râ matú sheq nhang kat é ru nghut lhê.

<sup>18</sup> Yhang lé lumjínng é sù gi, mara byí é hui râ a nghut; nghut kôlhang, Yhang lé a lumjínng é sù kúm gi, Garai Gasâng é Yhangzo zote lé a lumjínng é sù nghut é yanmai, mara byí é huí to gù bê nghut ri.

<sup>19</sup> Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit râ malaî, mauchut lé chyit akô nghut ri; haú gi, mara byí é hui râ hkyô yhang nghut ri.

<sup>20</sup> Agè ashop hkyô kut é sù ó yuq nghut kôle, maubó lé a nguì nghut ri; haú yuq gi, yhang kut é hkyô lhoq byông htoq kat râ lé gyuq é yanmai,

haû maubó shut lé lô râ a nghut.

<sup>21</sup> Nghut kôhng, haû tengmán hkyô dông asak dui é sù ó yuq le, yhumsing kut é hkyô gi, Garai Gasang lom é hkyô lé, san za byu-myàng sháng gaq ga, haû maubó shut lé lo ri." gâ ri.

*Yesuq Eq Séng Luî, Wui-myhup Sará Yohan Saksé Hkâm É Hkyô*

<sup>22</sup> Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haú má rayoq zo nyi luî, wui-myhup hkâm byî ri.

<sup>23</sup> Haú u lé, Yohan gi, Salim nàm mâ é E-nun gâ é jowò má, wui gyai myo joq é yanmai, wui-myhup hkám byî nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri.

<sup>24</sup> (Haû gi, Yohan lé htóng a lhoq hkyó shî é hkun lhê é hkyô nghut ri.)

<sup>25</sup> Haú hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luî, dang htíng htíng lhúm bum akô nghut ri.

<sup>26</sup> Hau htâng, yhangmoq gi, Yohan chyáng lé luî, "Rabai ê, Yodan làng hé hpoq shut nàng eq rahá nyi luî, nàng èq saksé hkám byî é Sù gi, ahkuî, wui-myhup hkám byî nyi é nghut mù, yuq hkangmó gi, Yhâng chyáng e bum akô nghut ri mhaî." ga, yhang lé taî akô.

<sup>27</sup> Haû eq séng luî, Yohan tû taî é gi, "Byù rayuq gi, mauhkúng mai byî é za a nghut jáng, haî le wó hap yù râ a nghut.

<sup>28</sup> 'Ngò gi, Hkrisduq a nghut, Yhang é hí má nhang kat huî é sù za nghut lhê.' nghû, ngò taî é lé, nungmoq yhang saksé nghut bum akô.

<sup>29</sup> Myisik wó é sù gi, lusik nghut ri. Lusik lé, láng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haû sù é gabú hkyô gi, ngá é gabú hkyô nghut mù, ngò má byíng jup nyi bê nghut ri.

<sup>30</sup> Yhang gi, kô jat lò ra râ nghut lhê; ngò gi, yom ló ra râ nghut lhê.

<sup>31</sup> Ahtoq mai lé é Sù gi, lhunglhâng é ahtoq má nghut ri; myigùng htoq mâ é sù kúm gi, myigùng htoq eq sêng é nghut luî, myigùng htoq eq sêng é dông za tâi ri; mauhkông mai lé é Sù gi, lhunglhâng é ahtoq má nghut ri.

<sup>32</sup> Yhang gi, wó myâng wó gyô é hkyô lé, saksé hkám kôlhâng, Yhang hkâm é saksé lé, ó yuq le a hap yù kó nghut ri.

<sup>33</sup> Yhâng é saksé lé hap yu é sù kúm gi, haû Garai Gasang gi, tengmán sù nghut ri ga, saksé shit é sù nghut bê.

<sup>34</sup> Garai Gasâng èq nhang kat é hui Sù gi, Garai Gasâng é mungdang lé tâi ri; hkâsu mù gâ le, Garai Gasang gi, haû Woi-nyí lé, laké a kat e za byí é yanmai nghut ri.

<sup>35</sup> Haû Îwa gi, Zo lé chyitdap luî, jung hkingmó lé Yhâng é loq má ap byi bê nghut ri.

<sup>36</sup> Haû Zo lé lumjíng é sù ó yuq nghut kôle, ahtum abyuq é asak wó lhê; nghut kôlhâng, haû Zo lé he-ngik pyâm é sù ó yuq nghut kôle, asak haû lé myàng râ a nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri." gâ ri.

## 4

*Yesuq Eq Samariq Myhí Huí É Hkyô*

<sup>1</sup> Yesuq gi, Yohan htoq má, chángzo je lhoq myô é eq wui-myhup hkám byî nyi ri gâ é hkyô lé, haû Hparishe pé wó gyô akô nghut ri.

<sup>2</sup> (Nghut kôlhang, gè gè ga jáng, Yesuq gi, Yhang wui-myhup hkám byî é a nghut, Yhâng é chángzô pé sheq ru nghut akô.)

<sup>3</sup> Haû hkyô lé, Yesuq sé jáng, Yhang gi, Yuda mau mai htoq mù, Galile mau shut dum taû lô bê nghut ri.

<sup>4</sup> Ahkuî, Yesuq gi, Samariq mau mai sô laî lô râ dut bê nghut ri.

<sup>5</sup> Haû mù, Yhang gi, Yakup mai yhang zo Yosep lé byî é maumyî rajap eq chyâng lhûm é, Suhka ga myhîng é, Samariq mau mâ é wà mó ralhum má lo jé ri.

<sup>6</sup> Haû má, Yakup é wuîhtung le joq to luî, Yesuq gi, hkyô sô ngu é yanmai, wuîhtung hau é nàm má zung gyó tô ri. Haû u gi, nyí-káng raxe í hkyíng\* nghut bê nghut ri.

<sup>7</sup> Haû hkûn, Samariq myiwe myhí rayuq wuî lé hkam ri; Yesuq gi, yhang lé, "Ngo lé wuî byi shuq laq." ga tâ ri.

<sup>8</sup> (Haû u gi, Yhâng é chángzô pé, zoshuq wuî râ matú wà hkaû shut e byuq kô é ahkyíng nghut ri.)

<sup>9</sup> Haû Samariq myiwe myhí gi, Yhang lé, "Nàng gi, Yudaq byù rayuq nghut to luî nhîng, ngò Samariq myiwe myhí chyáng, haî mù shuq wuî dúng lhê lhú?" ga tâ ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

---

\* **4:6** Nyí-káng raxe í hkyíng gi, Yudaq byu pé é hkyuq hkyíng nghut ri.

10 Haú hkûn, Yesuq gi, yhang lé, "Nàng gi, haú Garai Gasâng é chyunghuq lé le, nang lé wuì dung sù ó yuq nghut é lé le, sê é nghut le gi, noq mai Yhang lé dúng tôngbán luí, Yhang gi, nang lé asak-wuì byi berâ nghut lhê." ga tû tái ri.

11 Myiwe myhí haú gi, "Yhumsîng ê, Nàng gi, wuì hkâm râ zè haí le a wó, wuìhtung le nik ri; haú asak-wuì lé, Nàng hkâmâ é wó yû râ lú?"

12 Ngamoq é îwa Yakup gi, ngamoq lé wuìhtung shî byî to bê nghut lhê; yhang yhang le, yhang zo pé le, yhang rém é dusak pé le, wuìhtung shî mâ é wuì shuq bekô nghut ri; Nàng gi, Yakup htoq je kô lhê lú?" ga Yhang lé tái ri.

13 Yesuq gi, "Wuì shî lé shuq é sù ó yuq le, wuìshit é dum hui râ nghut lhê.

14 Nghut kôlhang, Ngò byî é wuì lé shuq é sù ó yuq nghut kôle, wuìshit é hkâm-nhám a hui lo râ nghut lhê. Ngò byî é wuì haú gi, haú yuq má, ahtum abyuq é asak matú wuìbúm dut râ nghut lhê." ga yhang lé tû tái ri.

15 Myiwe myhí haú gi, Yhang lé, "Yhumsîng ê, ngò gi, wuì le a shit lo, shî má wuì hkâm le a lé ra lo sháng gaq, wuì haú ngo lé byi laq." ga tái ri.

16 Haú hkûn, Yesuq gi, "Ló mù, nung làng lé ló wut lò aq." ga, yhang lé tái ri.

17 Yhang gi, "Ngò, làng a wó." ga tái jáng, Yesuq gi, yhang lé, "Nàng, làng a wó gâ é gi, têng ri.

18 Hkâsu mù gâ le, nang gi, yuqgè ngo yuq wó wú bê sù nghut ri; nang, ahkuí wó tô é yuqgè le nung làng a nghut. Nàng gi, têng é dang tái bê nghut ri." ga tái ri.



19 Haú hkûn, myiwe myhí haú gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê.

20 Ngamoq é îchyí îwâ pé gi, bùm shî má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akô nghut ri." ga taí ri.

21 Haú hkûn, Yesuq taí é gi, "Myiwe myhí ê, Ngo lé jîng aq; bùm shî má le a nghut, Yerusalem wà mó má le a nghut e za, haú Îwa lé noqkuq râ ahkyíng, jé lò nyì bê nghut ri.

22 Nungmoq Samariq byu pé gi, yhumsîng lhang a sê é lé, noqkuq akô; ngamoq kúm gi, ngamoq sé é lé noqkuq lhê; hkâsu mù gâ le, hkyi yù hkyô gi, Yudaq amyû mai lo é nghut lhê.†

23 Nghut kôlhang, haú têng é dông noqkuq é bang gi, woi-nyí mai le, tengmán hkyô mai le, haú Îwa lé noqkuq râ ahkyíng gi, jé lo nyì bê nghut luí, ahkuí lhang jé to bê nghut ri; hkâsu mù gâ le, haú Îwa gi, haú su kut noqkuq é bang lé ô nau ri.

24 Garai Gasang gi, woi-nyí nghut lhê; haú mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taí ri.

25 Myiwe myhí haú gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nganhúng lé banshoq taí sân kyo râ nghut lhê." ga taí ri.

26 Hau htâng, Yesuq gi, "Nàng eq dang nyo nyi é sù ngò gi, haú yuq nghut lhê." ga taí ri.

† 4:22 Bun zo shî má, Yesuq taí nau é gi, hkyi yù hkyô lé, Garai Gasang gi, Yudaq byu pé dông danggidiq byi to é nghut é lé taí nau é nghut ri.

*Haû Chángzô Pé Dum Taû Jé Lo É Hkûn Lhê Hkyô*

<sup>27</sup> Haú u lé, Yhâng é chángzô pé gi, dum taû jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng luî, maú byuq bum akô. Nghut kôlhang, "Nàng, haî ô ri lú?" ga le, "Haî mù Yhang eq dáng nyo nyi lhê lú?" ga le, Yhang lé ó yuq a myi kó nghut ri.

<sup>28</sup> Hau htâng, myiwe myhí haû gi, yhâng é wuì yambú lé tô pyâm to luî, wà shut taû wang ló mù, wà byù wuì lé ló taî kyô é gi,

<sup>29</sup> "Ngò kut lai lò bê hkyô pé lhunglhang lé, taî kyô é byù rayuq lé, lé wú keq! Yhang gi, Hkrisduq nghut lhê abe?" gâ ri.

<sup>30</sup> Haû mù, yhangmoq gi, wà mai htoq lé luî, Yesuq chyáng lé lo bum akô nghut ri.

<sup>31</sup> Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chòm taî akô.

<sup>32</sup> Haú hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tû taî ri.

<sup>33</sup> Haû mù, Yhâng é chángzô pé gi, "Yhang lé, rayuq yuq eq zoshuq lé dé byî é abe?" ga, rayuq eq rayuq taî lhùm bum akô.

<sup>34</sup> Haú hkûn, Yesuq taî é gi, "Ngo lé nhang kat Sû ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê.

<sup>35</sup> 'Kyôshu yoq jé râ gi, lhamó myi hkyap râ ashî.' ga, nungmoq lhaq taî lhê a nghut kó lú? Ngò, nungmoq lé taî kôlé, nungmoq é myoq hpóng luî, haû yò pé má wú kat wú keq! Kyôshi gi, myhíng luî, kyô shu yoq gi, jé to bê nghut ri.

<sup>36</sup> Haû kyô hkyó sù eq kyô shu sù gi, rahá wó gabú kó sháng gaq ga, ahkuí lhang, haû kyô shu sù

gi, yhâng é zuihpau lé myang yù luî, ahtum abyuq é asak é matú, kyôshi shû tsîng to bê nghut ri.

<sup>37</sup> Haû su mù, 'Rayuq gi, sân hkyó, góyuq gi, shû yù.' gâ é sanghkyang gi, têng ri.

<sup>38</sup> Nungmoq a zui saî tô é jang mâ é shû yù râ matú, nungmoq lé Ngò nhang kat bê nghut lâ. Góbang gi, haú má wum kat zui saî to bê nghut mù, nungmoq gi, haú bang zui saî é akyû lé shu yù bekô nghut ri." gâ ri.

### *Samariq Byù Myo Myo Lumjîng Kô É Hkyô*

<sup>39</sup> "Yhang gi, ngò kut lai lò bê hkyô lhunglhang lé, taî kyô ri." ga luî, myiwe myhí haû saksé hkâm é yanmai, haú wâ mâ é Samariq byù myo myo gi, Yesuq lé lumjîng bùm bekô nghut ri.

<sup>40</sup> Haû mù, Samariq byu pé gi, Yesuq chyáng lé jé kômù, yhangmoq eq nyì râ matú, Yhang lé lung kô é yanmai, Yhang gi, í nyí bo nyì bê nghut ri.

<sup>41</sup> Yhâng é dang pê é yanmai, byù myo myo gi, lumjîng bang dut jat lò bekô nghut ri.

<sup>42</sup> Yhangmoq gi, myiwe myhí haû lé, "Ahkuî, ngamoq lumjîng é gi, nàng taî é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sû nghut é lé, ngamoq sé bê nghut é yanmai nghut lâ." ga chôm taî akô nghut ri.

### *Mingsuwún Hpó É Yhangzo Lé Lhoq Gê Byî É Hkyô*

*Mht 8:5-13; Luk 7:1-10*

<sup>43</sup> Í nyí lai jáng, Yesuq gi, haû mai Galile mau shut htoq e ló bê nghut ri.

44 "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê.

45 Yesuq gi, Galile mau má jé é hkûn, Galile byu pé gi, Yhang lé lhom hkulum yu akô; yhangmoq gi, Yerusalem wà mó má, Lhoqlhai Poî ê lòm kô é nghut é yanmai, poî u lé, Yesuq kut é hkyô lhunglhang lé, myàng kô é bang nghut ri.

46 Yesuq gi, Yhang mai haû wui lé tsibiyiq wing dut nhang é, Galile mau mâ é Hkanaq wà mó má, ê dum kûm ri. Haû ming suwún rayuq é yhangzo yuqzo gi, Kaperna-um wà má no nyi ri.

47 Yesuq gi, Yuda mau mai Galile mau má jé lé bê gâ é hkyô lé, ming suwún haû wó gyo jáng, yhang gi, Yesuq chyáng ê mù, shî-nò no nyi é yhangzo lé, lé lhoq gê byi rá matú, Yhang lé dúng tóngbán ri.

48 Haû hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumjínng kó rá a nghut." ga taí ri.

49 Mingsuwún haû gi, "Yhumsîng ê, ngá zo a shî shimá gyó lé laq." ga taí ri.

50 Haû hkûn, Yesuq gi, "Nàng wó ló bê; nung zo byùn râ nghut lhê." ga tû taí ri.

Suwún haû gi, Yesuq taí é dang haû lé gyô jínng luí, tau ló bê nghut ri.

51 Yhang gi, hkyô má ru nghut nyi ashî hkûn, yhâng é dui-nhâng zoshâng wui gi, yhang lé lé hui luí, zoshâng haû gè byuq é hkyô, lé taí kyô akô nghut ri.

52 Yhang gi, yhang zo hkâ-nhám gè byuq é ahkyínng lé myi wú é hkûn, yhangmoq gi, "A-nyí

nap nyí hkyuí rahkyíng má, gùng nyé é chám ló byuq bê nghut ri." ga tái kyô akô.

<sup>53</sup> Haú hkûn, ahkyíng haú gi, "Nung zo byùn râ nghut lhê." ga, yhang lé, Yesuq tái é ahkyíng nghut é lé, haú yhângwa bûn sé bê nghut ri. Haú mù, yhang eq yhâng yhumbyù banshoq bang gi, lumjíng bekô nghut ri.

<sup>54</sup> Haú gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

## 5

### *Wuìhtum Yàm Má, Nòhpyo Lhoq Gê Byî É Hkyô*

<sup>1</sup> Hau htâng a myáng má, Yudaq byu pé é poí ralhum joq é yanmai, Yesuq gi, Yerusalem wà mó má doq ló ri.

<sup>2</sup> Ahkuî, haú Yerusalem wà mó é Sau Hkúmdong nàm má, Hebre myíng dông gi, Betzahta ga myhîng é wuìhtum ralhum joq ri; hau é lînghkyuq má, jìrop ngo lhum joq tô ri.

<sup>3</sup> Jìrop haú pé má, myoqjit bang, hkyî hten bang, gùngjum shî bang ajùm ayò leq tô bum akô. (Haú bang gi, wuì dui nún râ lé lánng tô é bang nghut akô.

<sup>4</sup> Hkâsu mù gâ le, haú Yhumsing é maumang lagyo gyó lé lé kut mù, wuì lé, lé lhu nhún jáng, wuìhtum haú má hí wó wang é sù gi, hái jung ana wa dap to kôlhang, ge byuq é huì é yanmai nghut ri.)\*

<sup>5</sup> Súm xe shit zân tup no nyi é byù rayuq le, haú má bo tô ri.

---

\* **5:4** Bun zo 3 lhum mâ é ahtang túm eq bun zo 4 lhum gi, chyúmding myo myo má a bo é nghut lhê.

<sup>6</sup> Yesuq gi, haú yuq no leq tô é lé myàng mù, haú su no nyì é gyai myáng bê nghut é hkyô lé sé jáng, yhang lé, "Nàng, gè nau ri lú?" ga myì ri.

<sup>7</sup> Nò sù haú yuq gi, "Yhumsîng ê, wuì dui nún lo é hkûn, wuìhtum má wàng râ matú, ngo lé garúm râ byù ó a nyì; ngò wàng râ nghû jáng, góyuq hí, ngá hí má wàng wàng dut ri." ga tû taí ri.

<sup>8</sup> Hau htâng, Yesuq gi, yhang lé, "Toq aq! Nàng é taphkang yu chûng luí, sô ló aq." ga taí ri.

<sup>9</sup> Haú yuq gi, radá dâm nò ge byuq bê nghut luí, yhâng é taphkang yù mù, sô ló bê nghut ri.

Haú nyì gi, Bánno buinyì nghut ri.

<sup>10</sup> Haú mù, Yudaq byu pé gi, haú nò ge byuq é hui sù lé, "Hkû-nyì gi, Bánno buinyì nyì nghut é yanmai, nàng, taphkang waq é gi, tarâ lu lai bê nghut ri." ga taí akô.

<sup>11</sup> Nghut kôhâng, yhang tû taí é gi, "Haú ngo lé lhoq gè byi sù gi, ngo lé, 'Nàng é taphkang yu chûng mù, sô ló aq.' ga taí é nghut lhê." gâ ri.

<sup>12</sup> Haú mù, yhangmoq gi, "'Nàng é taphkang yu chûng mù sô ló aq.' ga, nang lé taí é sù gi, ó yuq wá nghut ri lú?" ga myì akô.

<sup>13</sup> Nghut kôhâng, haú ó yuq nghut é lé, nò ge byuq é hui sù gi, a châng sê kat nghut ri; hkâsu mù gâ le, Yesuq gi, haú mâ é byù moq mó má wang nyó ló byuq é yanmai nghut ri.

<sup>14</sup> Htâng má, Yesuq gi, haú yuq lé noqkuq yhûm má myàng jáng, "Wú aq, nàng wángzán bê nghut ri; hí lhê htoq má je wuìhke é hkyô a hui zo sháng gaq, mara hkâkut shut lo." ga luí, yhang lé taí ri.

<sup>15</sup> Haú yuq gi, htoq ló mù, yhang lé lhoq gè byì é sù gi, Yesuq nghut ri ga, Yudaq byu pé lé taí kyô ri.

### *Asak Wó Yû Râ Hkyô*

16 Haû mù, Yudaq byu pé gi, Bánno buinyì nyí má, Yesuq, haû hkyô kut é yanmai, Yhang lé gun-jang lo akô nghut ri.

17 Haû hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mù zuí nyi é nghut mù, Ngò le mù zuí nyi lhê." ga taí ri.

18 Haû mù luí, Yesuq gi, Bánno buinyì lé lhoq htên é htoq agó, Garai Gasang lé lháng, Yhâng Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

19 Yesuq, yhangmoq lé tû taí é gi, "Ngò, nungmoq lé teng za taí kôlé, haû Zo gi, yhumsing é myit dông haí le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gâ le, haû Íwa kut é hkyô lé za, haû Zo châng kut é yanmai nghut lhê.

20 Hkâsu mù gâ le, haû Íwa gi, Zo lé chyitdap é nghut luí, Yhang kut é hkyô lhungháng, haû Zo lé tûn shit ri; nungmoq maú hông shoq, shí pé htoq je ko é hkyô pé lé lháng, haû Zo lé tûn shit shirâ nghut lhê.

21 Haû Íwa gi, shí bê bang lé lhoq dui toq mù, yhangmoq lé asak byí é eq rajung za, haû Zo le, Yhang byí nau é bang lé, asak byi râ nghut lhê.

22 Hau htoq agó, haû Íwa lé hkunggâ é eq rajung za, haû Zo lé le, lhunghâng bang hkungga kó sháng gaq ga, haû Íwa gi, ó yuq lé le a jéyáng e za, jéyáng é hkyô lhungháng, haû Zo lé lum to bê nghut ri.

23 Haû Zo lé a hkunggâ é sù gi, haû Yhang lé nhang kat é sù Íwa lé le, a hkunggâ é sù nghut ri.

24 Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sû lé lumjínq é sù, ó yuq nghut kôle, mara byí é a hui e za, ahtum abyuq é asak wó é nghut lhê; haú yuq gi, shi é mai lut luí, asak duì bê sù nghut ri.

25 Ngò, nungmoq lé teng za taí kôlé, haú Garai Gasâng é Yhangzô é htê lé, shi byuq bê bang wó gyo râ ahkyínq gi, jé lo nyì bê nghut ri; ahkuí lhang jé to bê nghut ri. Htê haú lé gyô é bang gi, asak duì kó râ nghut lhê.

26 Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri.

27 Hau htoq agó, Yhang gi, haú Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

28 Shí hkyô lé hkâ-maú hong nyì kó: lup pé má lúng tô é bang banshoq gi, Yhâng é htê lé wó gyo kôluí, htoq ló râ ahkyínq jé lò râ nghut lhê.

29 Ge é hkyô kut é bang gi, asak duì râ matú, dui toq kó râ nghut lhê; agè ashop hkyô kut é bang gi, mara byí é hui zo râ matú, dui toq kó râ nghut lhê.

30 Ngò gi, Ngá myit đông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é đông châng é a nghut e za, Ngo lé nhang kat é Sû ô nau é đông châng é sheq ru nghut lhê.

### *Yesuq Eq Séng Luí, Saksé Hkâm É Hkyô*

31 Ngá gûng lé ngò saksé hkâm é nghut jáng, ngò za saksé hkâm é hkyô gi, teng râ a nghut.



<sup>32</sup> Ngá é hkyô lé saksé hkám byî é Sû (Ngá Wa) góyuq nyi lhê; Ngò eq séng luî, haú yuq hkám é saksé gi, têng é hkyô lé, Ngò sê lhê.

<sup>33</sup> Nungmoq gi, Yohan† chyáng byù nhang kat wú bekô nghut ri; yhang gi, haú tengmán hkyô lé saksé hkám byi bê nghut lhê.

<sup>34</sup> Ngò gi, xângzo byu pé mai saksé hkám byi râ lé, ra luî a nghut, nghut kôlhang, nungmoq hkyi yu é wó hui râ matú sheq, haú su nghû taî é ru nghut lhê.

<sup>35</sup> Yohan gi, duq nyi é myibung su duqbó byî é nghut mù luî, nungmoq gi, haú duqbó é hkaú má, rayoq zo ngón nau nyi akô nghut ri.

<sup>36</sup> Nghut kôlhang, Ngò wó é saksé gi, Yohan byî é saksé htoq je kô lhê; hkâsu mù gâ le, ahkuî Ngò zui saî nyi é muzó gi, Ngò lhoq pán râ matú, haú Íwa, Ngo lé ap byî tô é nghut luî, haú Íwa, Ngo lé nhang kat é hkyô lé, saksé hkám byî nyi ri.

<sup>37</sup> Hau htoq agó, haú Ngo lé nhang kat é sù Íwa le, Ngò eq séng luî saksé hkám byî ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó;

<sup>38</sup> haú Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjǐng kô é yanmai nghut ri.

<sup>39</sup> Nungmoq gi, haú Chyúmdang mai ahtum abyuq é asak wó yû râ nghut lhê ga myit yù kô é yanmai, haú Chyúmdang má ho wú akô nghut ri; nghut kôlhang, Chyúmdang haú gi, Ngò eq séng luî saksé hkám byî ri;

---

† 5:33 Yohan shí yuq gi, Wui-myhup Sará Yohan nghut lhê.

<sup>40</sup> nghut kôlhang, asak wó yû râ matú, nungmoq gi, Ngá chyáng a kâm lé kó nghut ri.

<sup>41</sup> Ngò gi, byu èq hkya-ôn é lé a lhom yu é nghut lhê.

<sup>42</sup> Nghut kôlhang, nungmoq lé gi, Ngò sê lhê; nungmoq é i-myt hkaû má, Garai Gasang lé chy-itdap é myit a bò kó nghut ri.

<sup>43</sup> Ngò gi, Ngá Wâ é myìng mai jé lé é sù nghut kôlhang, nungmoq gi, Ngo lé a lhom hap yù kó; yhâng myìng yhang lang é byù, gotû rayuq jé lé é ru nghut le gi, haù yuq lé, nungmoq lhom hap yù kó râ nghut lhê.

<sup>44</sup> Nungmoq gi, rayuq eq rayuq hkya-ôn lhùm é lé za hap yù luì, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhîng, hkâsu kut wó lumjîng kó râ lhú?

<sup>45</sup> Nghut kôlhang, haù Íwâ é hí má, Ngò, nungmoq lé mara hûn nhô hkâ-ngâm kó; nungmoq lé mara hun é sù gi, haù nungmoq mai myit myoqbyu tô é Mosheq ru nghut lhê.

<sup>46</sup> Mosheq lé nungmoq gè gè yhang lumjîng kô é ru nghut le gi, Ngo lé le lumjîng kó râ nghut lhê; hkâsu mù gâ le, Mosheq gi, Ngá é hkyô lé kê tô é sù nghut ri.

<sup>47</sup> Nghut kôlhang, nungmoq gi, yhang kê tô é pé lé lháng a lumjîng kô é nhîng, Ngá dang lé, hkâsu kut wó lumjîng kó râ lhú?" gâ ri.

## 6

*Byù Ngo Hkyîng Lé Zoshuq Byi Tsô É Hkyô  
Mht 14:13-21; Mrk 6:30-44; Luk 9:10-17*

<sup>1</sup> Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap ló bê nghut ri.

<sup>2</sup> Haú hkûn, byù ajùm ayò gi, haú nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri.

<sup>3</sup> Yesuq gi, bùm shut doq ló mù, Yhâng é chángzô pé eq rahá zung tô ri.

<sup>4</sup> Yudaq byu pé é Lhoqlhai Poí gi, chyâng lo nyi bê nghut ri.

<sup>5</sup> Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo râ muk, nga-nhúng, hkâmá é wó wui râ lú?" ga tái ri.

<sup>6</sup> Yesuq, haú su ga tái é gi, yhang lé chyam wú râ matú za nghut ri; hkâsu mù gâ le, hkâsu kut râ hkyô gi, Yhâng é myit má bo to gù bê nghut ri.

<sup>7</sup> Hpilip gi, Yhang lé, "Denari\* í sho eq muk wui le lhang, rayuq ratsuí tsuí ngap râ a nghut." ga tû tái ri.

<sup>8</sup> Haú hkûn, Yhâng é chángzo nghut é, Simun Petruq é yhanggu Andre gi, Yhang lé,

<sup>9</sup> "Muk-yo muk ngo long eq ngozo í du wó é yuqgè zo rayuq, shí má nyi ri; nghut kôlhang, byù shí myhò bang lé luq shoq, hkâsu kut wó gâm byi râ lú?" ga tái htoq kat ri.

<sup>10</sup> Yesuq gi, "Haú shiwa byu pé lé, zùng nhâng keq." ga tái ri. Jowò haú gi, mhán htu é jang nghut mù, yuqgè wui baú lhang, ngo hkyîng kô zung tô bùm bekô nghut ri;

---

\* 6:7 Denari rachap gi, byù rayuq é ra-nyí é zuihpau eq wui é nghut lè.

<sup>11</sup> hau htâng, Yesuq gi, muk long pé lé yù mù, jeju hkya-on luî, zung tô é bang lé, yhangmoq o é myhó tsing gàm byí ri. Haû eq rajung za, ngozo lé le haû su kut ri.

<sup>12</sup> Yhangmoq banshoq bang zô gyî bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsîng yù keq. Haî le a langsa pyám sháng gaq." ga taî ri.

<sup>13</sup> Haû mù, yhangmoq gi, zô myhit tô é muk-yo muk ngo long mâ é ajap azo pé lé châng guq tsîng le, raxe í mung byíng shoq wó guq tsîng yu akô nghut ri.

<sup>14</sup> Haû shiwa byu pé gi, Yesuq kut é limik kumlhá lé myàng kô é hkûn, "Shí yuq gi, mingkan htoq má jé lé lô râ gâ é, Myiqhtoi yhang nghut ri-nhung!" ga taî bum akô.

<sup>15</sup> Yesuq gi, yhangmoq lé mù, Yhang lé hkohkâm zik kut nhâng kó râ dâ é hkyô lé, sê é yanmai, Yhang baú tsik za bùm shut dum haq doq ló bé nghut ri.

### *Yesuq, Wuì Htoq Má Sô É Hkyô*

*Mht 14:22-27; Mrk 6:45-52*

<sup>16</sup> Buigyum htâng, Yhâng é chángzô pé gi, haû nhông shut gyó ló mù,

<sup>17</sup> lhaî má wang ji luî, nhông hé hpoq mâ é Kaperna-um wà shut gû e ló akô; haú hkûn, mauchut bê nghut kôlhang, Yesuq gi, yhangmoq chyáng a jé gyó lo shi nghut ri.

<sup>18</sup> Haú u lé, laidun htan lo é yanmai, wuìhêng toq lô bé nghut ri.

<sup>19</sup> Yhangmoq gi, sum myi déng kô lhaî kôn e ló kô é hkûn, Yesuq gi, nhông htoq má so luî, haû lhaî

shut chyâng lé lo nyi é lé myàng kômù, gyuq dan bùm bekô nghut ri.

<sup>20</sup> Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé tai ri.

<sup>21</sup> Haù mù, yhangmoq gi, Yesuq lé gabú myit èq lhaì hkaù má shuì hâng yù nau akô. Haù hkùn, lhaì haù gi, radá dâm yhangmoq jé nau é jang wuiyàm má jé bê nghut ri.

<sup>22</sup> Nhông hé hpoq má nyi tô é byù moq mó gi, haù má lhaì racham za joq laí lo é hkyô eq, lhaì haù má Yesuq a bo doq jì e za, chángzô pé baù jì htoq ló kô é hkyô lé, hau htang nyí, bûn sê kat akô nghut ri.

<sup>23</sup> Haù hkùn, haù Yhumsîng, jeju hkya-ôn é htâng, byu pé muk zô é jowò nàm má, Tiberi myuq mâ é lhaì pé jé lé bum ri.

<sup>24</sup> Haù byù moq mó gi, Yesuq eq Yhâng é chángzô pé, haù má a nyì lo kô é hkyô lé sé kô é yanmai, Yesuq lé châng hô râ matú lhaì haù pé má wang jì mù, Kaperna-um wà shut e ló akô nghut ri.

### *Yesuq, Asak Muk Nghut É Hkyô*

<sup>25</sup> Yhangmoq gi, nhông hé hpoq má Yesuq lé myàng kôjáng, "Rabai ê, Nàng gi, shí má hkâ-nhám jé lé é lhu?" ga, Yhang lé myí akô.

<sup>26</sup> Haù hkùn, Yesuq gi, "Ngò, nungmoq lé teng za tai kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê.

<sup>27</sup> Htên byuq sê é zoshuq é matú, hkâshikut kó; haù Byu Yhangzo byi râ nghut é ahtum abyuq é asak é matú, ru gîng nyi é zoshuq wó yù râ lé sheq shikut nyì keq. Yhâng chyáng gi, haù Íwa Garai

Gasang mai Yhâng é saksé dizik tap to bê nghut lhê." ga tâ tai ri.

28 Haû mù, yhangmoq gi, "Garai Gasang ô nau é muzó pé zui saí râ matú, ngamoq haí kut ra râ lhú?" ga Yhang lé myî akô.

29 Haú hkûn, Yesuq gi, "Garai Gasang nhang kat é Sû lé, lumjîng é gi, Garai Gasang ô nau é muzó nghut bê." ga tâ tai ri.

30 Haû mù luî, yhangmoq gi, Yhang lé, "Ngamoq myoq èq wó myâng luî, Nàng lé lumjîng râ matú, Nàng, haí jung limik kumlhá kut shit râ lhú? Nàng, haí jung kut shit râ lhú?"

31 Haû Chyúmdang má, 'Yhang gi, yhangmoq zo râ matú, mauhkûng mai muk byî ri. ✧ ga kê tô é eq rajung za, ngamoq é îchyí îwa pé gi, haú yoso hkaú má mannaq muk zo bekô nghut lhê." ga tâ akô.

32 Haú hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byî é Sû gi, Mosheq a nghut, haú Ngá Wa sheq, nungmoq lé mauhkûng mai tengmán é muk byî é Sû ru nghut lhê.

33 Hkâsu mù gâ le, Garai Gasang byî é muk gi, mauhkûng mai gyó lé luî, haú mingkan lé asak byî é Sû nghut lhê." ga tâ ri.

34 Yhangmoq gi, "Yhumsîng ê, ahkuî mai, ngamoq lé muk haú hkâ-nhám le byî nyî laq." ga chôm tâi bum akô.

35 Haû mù, Yesuq tâi kyô é gi, "Ngò gi, asak muk nghut lhê. Ngá chyáng lé é sû gi, hkâ-nhám le zòmut é hui râ a nghut; Ngo lé lumjîng é sû le, hkâ-nhám le wuîshit é hui râ a nghut.

36 Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjǐng shi kó nghut ri.

37 Haû Íwa mai Ngo lé ap byî tô é byù lhunglhang bang gi, Ngá chyáng lé kó râ nghut luî, Ngá chyáng lé é sù ó yuq lé le, Ngò gi, hkâ-nhám lé hkat htoq pyám râ a nghut.

38 Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê.

39 Haû Ngo lé nhang kat Sû ô nau é hkyô gi, Yhang mai Ngo lé ap byî tô é bang mâ é rayuq lé lhang, Ngò, a lhoq hpyuq pyâm e za, jìhtûm buinyì má yhangmoq lé dum lhoq dui toq yû râ matú ru nghut lhê.

40 Hkâsu mù gâ le, Ngá Wa ô nau é hkyô gi, haû Zo lé wú mù, Yhang lé lumjǐng é sù yuq hkangmó, ahtum abyuq é asak lé wó yû râ matú nghut lhê; Ngò le, jìhtûm buinyì má haú bang lé lhoq dui toq râ nghut lhê." gâ ri.

41 Haû mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luî, Yudaq byu pé taí put kó é gi,

42 "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lú? Haû sù é nhîng, ahkuí, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lú?" gâ bum akô.

43 Haú hkûn, Yesuq gi, "Nungmoq ahkaû má hkâtaí put nyì kó.

44 Haû Ngo lé nhang kat é sù Íwa mai shuî jé é sù

za a nghut jáng, ó yuq le Ngá chyáng wó jé lé râ a nghut; jé lé é sù lé gi, jihtùm buinyì má, Ngò lhoq dui toq râ nghut lhê.

<sup>45</sup> Myiqhtoi laiká pé má, 'Yhangmoq lhunglhâng bang gi, Garai Gasâng èq mhoq byì é hui kó râ nghut lhê.'<sup>☆</sup> ga kê tô é eq rajung za, haù Íwâ chyáng mai gyo yù, mhoq yu é bang yuq hkangmó gi, Ngá chyáng lé kó râ nghut lhê.

<sup>46</sup> Haù gi, rayuq yuq mai, haù Íwa lé myang wú bê nghù nau é a nghut; Garai Gasâng chyáng mâ é Sù za sheq, haù Íwa lé myang wú é Sù nghut lhê.

<sup>47</sup> Ngò, nungmoq lé teng za taí kôlé, lumjíng é sù gi, ahtum abyuq é asak wó lhê.

<sup>48</sup> Ngò gi, asak muk nghut lhê.

<sup>49</sup> Nungmoq é îchyí íwâ pé gi, haù yoso hkaù má mannaq muk zo bekô nghut lhê; nghut kôle, shi byuq bekô nghut ri.

<sup>50</sup> Nghut kôlhâng, shî gi, mauhkûng mai gyó lé lo é muk nghut lhê; haù lé zô é sù gi, a shî lo râ nghut lhê.

<sup>51</sup> Ngò gi, mauhkûng mai gyó lé lo é, haù asak dui é muk nghut lhê; rayuq yuq, muk shî lé zô é nghut le gi, ahtum abyuq dui nyì râ nghut lhê; muk shî gi, mینگkan zô wui é asak matú, Ngò byi râ nghut é Ngá gungsho nghut lhê." ga tû taí ri.

<sup>52</sup> Haù mù, haù Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso râ lhú?" ga, yhangmoq yhangchang dang htíng htíng lhùm bum akô.

<sup>53</sup> Haù hkûn, Yesuq gi, yhangmoq lé, "Ngò, nungmoq lé teng za taí kôlé, haù Byu Yhangzô é gung-

---

<sup>☆</sup> 6:45 Esai 54:13



sho lé zô é eq Yhâng é sui lé shuq e za a nghut le gi, nungmoq asak wó kó râ a nghut.

<sup>54</sup> Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jìhtùm buinyì má, haú yuq lé lhoq dui toq yû râ nghut lhê.

<sup>55</sup> Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê.

<sup>56</sup> Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyî luî, Ngò le haú yuq má nghut nyî bê nghut lhê.

<sup>57</sup> Haù rû dui nyi é Îwa gi, Ngo lé nhang kat luî, Ngò gi, haù Îwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi râ nghut lhê.

<sup>58</sup> Shî gi, mauhkông mai gyó lé lo é muk nghut lhê. Nungmoq é îchyl îwâ pé gi, mannaq muk zo kôle, shi byuq bekô nghut ri; nghut kôlhang, muk shî lé zô é sù gi, ahtum abyuq dui nyi râ nghut lhê." ga taí ri.

<sup>59</sup> Dang haú pé gi, Yesuq, Kaperna-um wà mâ é tarajong má mhoqshit nyi é u lé, taí é dang nghut ri.

### *Chángzô Pé Myo Myo, Yesuq Lé Kâng Pyâm To Kô É Hkyô*

<sup>60</sup> Yhâng é chángzô pé myo myo gi, haù lé wó gyo kôjáng, "Dang shî gi, gyai wuî ri. Ó yuq wá wó cháng râ lúh?" ga taí bum akô.

<sup>61</sup> Yesuq gi, haù eq séng luî, Yhâng é chángzô pé taí put nyi bùm kô é lé Yhâng é myit má sé luî,

yhangmoq lé, "Dang shi é yanmai, nungmoq myit htên bum akô lú?"

<sup>62</sup> Haû Byu Yhangzo gi, Yhang nyi lai lò bê jowò shut taû doq ló é lé, nungmoq myàng kô é nghut le gi, hkâsu nghû kó râ lú?"

<sup>63</sup> Haû Woi-nyí gi, asak byî lhê; gungsho kúm gi, haî le a wó dut nghut ri. Nungmoq lé, Ngò taî é dang pé gi, Woi-nyí le nghut lhê, asak le nghut lhê.

<sup>64</sup> Nghut kôle, nungmoq chyáng mâ é ra-am gi, a lumjǐng kó nghut ri." ga taî ri. Hkâsu mù gâ le, ô pé gi, a lumjǐng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri.

<sup>65</sup> Yhang xoq taî é gi, "Haû su mù, haû Íwâ èq ahkáng byî é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taî kyo wú bê nghut lhê." gâ ri.

<sup>66</sup> Haú dàm mai, Yhâng é chángzô pé myo myo gi, Yhâng htâng a cháng lo kô e za, taû ló byuq bùm bekô nghut ri.

<sup>67</sup> Haû su mù, Yesuq gi, haû chángzo raxe í yuq lé, "Nungmoq le, ló byuq nau akô, a nghut lú?" ga myî ri.

<sup>68</sup> Haú hkûn, Simun Petruq gi, "Yhumsîng ê, Nàng gi, ahtum abyuq é asak mungdang wó Sû nghut to bê lé nhîng, ngamoq gi, ó yuq chyáng é shirâ lú?"

<sup>69</sup> Nàng gi, Garai Gasâng é Chyoiyúng Sû nghut é lé, ngamoq, lumjǐng lhê, sê nyi lhê." ga, Yhang lé tû taî ri.

<sup>70</sup> Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lú? Nghut kôle, nungmoq mâ é rayuq gi, nat nghut ri." ga tû taî ri.

<sup>71</sup> (Yhang gi, haû Simun Iskarut é yhangzo, Yudaq lé taí nau é nghut ri; haú yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

## 7

### *Yesuq Eq Yhâng É Gumang Wui*

<sup>1</sup> Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri.

<sup>2</sup> Nghut kôlhang, haû Yudaq byu pé é Saksé Zúm Poî chyâng lo nyi é hkûn,

<sup>3</sup> Yesuq é yhanggu yuqzô pé gi, Yhang lé, "Náng é chángzô pé gi, Náng kut é laklaí kumlhá pé lé myàng kó sháng gaq, Náng, shî mai htoq ló luî, Yuda mau shut e ló aq.

<sup>4</sup> Myìng hu nau é sù gi, hkaû zaú luî haî le a kut wú é nghut lhê. Náng gi, haú pé lé kut nyî bê nghut é yanmai, mingkan lé, Náng gûng tân shit aq." ga taî akô.

<sup>5</sup> Hkâsu mù gâ le, yhanggu sîng yuqzô pé lhang, Yhang lé a lumjîng kó nghut ri.

<sup>6</sup> Haû mù luî, Yesuq gi, yhangmoq lé, "Ngá é ahkyíng gi, a jé shi nghut ri; nungmoq é ahkyíng kúm gi, hká hkûn le joq nyi ri.

<sup>7</sup> Haû mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haî mù gâ le, yhang kut é hkyô gi, agè ashop é nghut é lé, Ngò, saksé tân shit é yanmai nghut ri.

<sup>8</sup> Nungmoq gi, poi haú shut doq ló keq. Ngò kúm gi, Ngá é ahkying a jé shi nghut é yanmai, poi haú shut a doq ló shirâ nghut lhê." ga tâ ri.

<sup>9</sup> Haú su ga tái lui, Yhang gi, Galile mau má nyi gyó to bê nghut ri.

<sup>10</sup> Nghut kôlhang, Yhang gu pé, haú poi shut doq ló byuq é htâng má, Yhang gi, de de a nghut é đông, tsik za châng doq ló bê nghut ri.

<sup>11</sup> Yudaq byu pé gi, haú poi má, Yhang lé châng hô kômù, "Haú yuq gi, hkâmá nghut lhê lú?" ga, myi wún akô nghut ri.

<sup>12</sup> Haú byù hpông hkaú má, Yhang eq séng lui tái lhùm bùm kô é má, ra-am gi, "Yhang gi, byù gè nghut ri." ga tái kôjáng, ra-am gi, "A nghut, Yhang gi, byu pé lé hkyô shuí ngoq sù nghut ri." ga tâ tái akô.

<sup>13</sup> Nghut kôlhang, haú Yudaq suwún wuú lé gyuq kô é yanmai, ó yuq le, Yhang eq séng é hkyô lé de de a wám tái kó nghut ri.

### *Haú Poi Má, Yesuq Mhoqshit É Hkyô*

<sup>14</sup> Haú poi rawuí nghut ló é hkún, Yesuq gi, noqkuq yhùm má doq ê lui, mhoqshit hi ló bê nghut ri.

<sup>15</sup> Haú hkún, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haú-í hkâsù mù sê lhê laq?" ga myi bum akô.

<sup>16</sup> Haú mù, Yesuq tâ tái é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê.

<sup>17</sup> Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasâng chyáng mâ é nghut a nghut é eq,

Ngá é myit đông taí é dang nghut a nghut é lé, yhang sê gàm hkoq yû râ nghut lhê.

18 Yhumsing é myit đông taí é sủ gi, yhumsing é matú aróng hô sủ nghut ri; nghut kôlhang, yhumsing lé nhang kat su é matú, aróng ho é sủ gi, tengmán é byû nghut ri; yhang má, a tengmán é hkyô haí le a bò nghut ri.

19 Mosheq gi, nungmoq lé jep é tarâ byí to bê, a nghut kó lú? Nghut kôlhang, nungmoq ó yuq le, jep é tarâ haú lé a cháng kó nghut ri. Haí mù luí, Ngo lé sat nau nyi akô lú?" gâ ri.

20 Haú hkûn, haú byû hpûng gi, "Nàng gi, nat gang wang to sủ nghut ri-nhung! Nang lé, ó yuq wá sat nau nyi ri lú?" ga tû taí akô.

21 Yesuq gi, yhangmoq lé, "Ngò, laklaí kumlhá ralhũm kut jáng, nungmoq banshoq bang gi, maú byuq bum akô.

22 Nghut kôlhang, nungmoq gi, ahpyo-kuq hpyit byí é hkyô lé, Mosheq byí é nghut lhê ga luí, Bánno buinyì má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchý íwâ pè chyáng mai lo é ru nghut lhê.).

23 Haú, Mosheq é jep é tarâ lé a lhoq htên pyám sháng gaq nghũ, Bánno buinyì má, zoshâng lé ahpyo-kuq hpyit byí é nghut le gi, haí mù luí, Bánno buinyì má, byû rayuq é gùng gón lé, Ngo lhoq gè byí é yanmai, Ngo lé nhikjum yô akô lú?

24 Byû du lé wú luí hkâjéyáng kó; tengmán é đông sheq jéyáng keq." ga taí ri.

*Yesuq Gi, Hkrisduq Nghut Lhê Lhú?*

25 Haû mù luí, Yerusalem wà mó mâ é byu pé ram gi, "Haû yhangmoq sat pyám nau nyi é sù gi, shí yuq a nghut lhi?

26 Yhang gi, shî má de de dáng nyo nyi le, yhangmoq gi, Yhang lé, haî le a ga kó myhi-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe?

27 Haû Hkrisduq jé lé é hkûn gi, Yhang hkâmai lé lo é lé, ó yuq lháng sé râ a nghut." ga taî bum akô. Nghut kôlhang, shí yuq gi, hkâmâ é sù nghut é lé, nga-nhúng sê lhê;

28 Haû mù, Yesuq gi, noqkuq yhûm wàng má mhoqshit uchyang, htê mó èq taî kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit đông shî má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang,

29 Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

30 Haû mù, yhangmoq gi, Yhang lé chyup râ dâ akô; nghut kôlhang, Yhâng é ahkýng a jé shi é yanmai, Yhang lé chyup râ matú, ó yuq le loq a jé kó nghut ri.

31 Nghut kôlhang, byù hpûng hkaû mâ é bang myo myo gi, Yhang lé lumjîng bûm kôluí, "Haû Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit râ lhu?" ga taî bum akô nghut ri.

32 Haû Hparishe pé gi, haû byù hpûng hkaû má, Yesuq eq sêng é hkyô lé, haû su ga dangsoq soq

lhûm nyi kô é hkyô lé wó gyô yu akô. Haû mù, haû hkyangjong agyi pé eq Hparishe pé gi, Yhang lé ê chyup râ matú, noqkuq yhûm zúng é bang lé nhang kat akô.

<sup>33</sup> Haú hkûn, Yesuq gi, "Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat Su chyáng taû ló râ nghut lhê.

<sup>34</sup> Haú hkûn, nungmoq gi, Ngo lé hô kôlhang, myang hô kó râ a nghut; Ngò nyi é jang má, nungmoq wó jé kó râ a nghut." ga taî ri.

<sup>35</sup> Hau é yanmai, Yudaq byu pé, rayuq eq rayuq taî lhum kô é gi, "Shí yuq gi, Yhang lé nga-nhúng a myang hô loshoq, hká shut e byuq râ dâ lhê lhú? Yhang gi, Grik byu pé má nyi byo myín tô é nga-nhúng é byu pé nyi é jowò má ê mù, Grik byu pé lé, ê mhoqshít râ dâ lhê lhú?

<sup>36</sup> 'Nungmoq gi, Ngo lé hô kôlhang, myang hô kó râ a nghut.' gâ é eq, 'Ngò nyi é jang má, nungmoq wó jé kó râ a nghut.' gâ é, Yhang taî é dang gi, hái jung wá gá naû é nghut lhê lhú?" gâ akô.

<sup>37</sup> Haû lô htâng é eq je ahkyak é Poî buinyi má, Yesuq toq yap luî, htê mó èq taî é gi, "Wuì shit sù gi, Ngá chyáng lé mù, shuq sháng gaq.

<sup>38</sup> Ngo lé lumjíng é sù ó yuq nghut kôle, haû Chyúmdang má taî tô é eq rajung za, 'Yhâng chyáng mai asak uchyâm é wuìlàng yui htoq lô râ nghut lhê.'" gâ ri.

<sup>39</sup> Yhang haû su gâ é gi, Yhang lé lumjíng é bang myang hap yù râ nghut é, haû Woi-nyí lé taî é nghut ri. Haú hkûn jé shoq, haû Woi-nyí lé a byi kat shi nghut ri. Hkâsu mù gâ le, Yesuq gi,

hpungwup shingkang dan hû é a hui nhâng shi é yanmai nghut ri.

<sup>40</sup> Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haú nghut ri." ga taí akô.

<sup>41</sup> Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé râ nghut lhê lhú?

<sup>42</sup> Haú Chyúmdang má, Hkrisduq gi, Dawiq é awut ashín mâ é nghut luí, Dawiq nyi lai lo é Betlehem wà mai htoq ló râ nghut lhê gâ é, a nghut lhú?" ga myí bum akô nghut ri.

<sup>43</sup> Haú mù luí, Yesuq é yanmai, shiwa byu pé gi, gàm hkoq lò byuq bekô nghut ri.

<sup>44</sup> Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

### *Yudaq Byu Pé Lé Shuí U É Bang A Lumjínq Kô É Hkyô*

<sup>45</sup> Hau htâng má, haú noqkuq yhûm zúng bang gi, haú hkyangjong agyi pé eq Hparishe pê chyáng taú ló kô é hkûn, haú bang gi, yhangmoq lé, "Nungmoq, haí mù luí, Yhang lé a shuí lo kô é lhú?" ga lhom myí akô.

<sup>46</sup> Haú hkûn, haú noqkuq yhûm zúng bang gi, "Shí yuq su ga taí é byù gi, ó le a nyi wú é nghut lhê." ga taí kyô akô.

<sup>47</sup> Haú mù, haú Hparishe pé gi, "Nungmoq lé le, Yhang èq mhoq hpyoq yù bekô lhú?

<sup>48</sup> Haú zaú wui chyáng le, Hparishe pê chyáng le, Yhang lé lumjínq é byù bò akô lhú?



49 A bò! Nghut kôlhang, haû jep é tarâ lé a sê é byù moq mó shî gi, nhîng pyâm é hui bekô nghut ri." ga nhik-yô é dông tû taí kat akô nghut ri.

50 Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi,

51 "Nga-nhúng é tarâ gi, byù rayuq lé, yhâng é dang hí a gyô wú é eq, yhang haí kut é lé a sê e za, mara byi lê lhú?" ga, yhangmoq lé myî ri.

52 Haú hkûn, yhangmoq gi, "Nàng le, Galile mau byù nghut lê lhú? Galile mau mai myiqhtoi rayuq lhang a htoq é hkyô lé, nàng gon wú aq, haû jáng sé râ nghut lê." ga tû taí akô.

53 Hau htâng, yuq hkanmó gi, ó le ô yhûm shut taû ló byuq bùm bekô nghut ri.\*

## 8

### *Yesuq Lé, Lé Myî Chyam Wú Kô É Hkyô*

1 Yesuq kúm gi, Tsanlun Bùm shut e ló bê nghut ri.

2 Htang napkyó napsûn noq le, Yesuq gi, noqkuq yhûm wàng hkaû má dum ê luî, byu pé lhunglhang gi, Yhâng é lhînghkyuq má lé zîng bum akô; haû mù, Yhang gi, zung to luî, yhangmoq lé mhôqshit ri.

3 Haú hkûn, haû tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuî lé lô kômù, gung gûng má shap to kôluî,

4 Yesuq lé, "Sarâ ê, myiwe myhí shî lé, sulàng shut nyi é má myang chyup yu é nghut lê.

\* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lê.

<sup>5</sup> Haû Mosheq é tarâ má gi, shî su é myiwe lé, luqgok èq dú sat pyám keq ga, nga-nhúng lé hkunmó hkyô tô ri. Ahkuí, Nàng gi, hkâsu nghú râ lhú?" ga myí akô.

<sup>6</sup> Yhangmoq haû su ga myí é hkyô gi, Yhang lé mara wó hûn shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má loqnyhuí èq htaû kê nyi ri.

<sup>7</sup> Yhang lé, yhangmoq ru jang myí nyi kô é hkûn, Yhang gi, yap nyhang kat mù, yhangmoq lé, "Nungmoq mâ é mara a wó é sù hí, myiwe myhí shí yuq lé luqgok èq dú sháng gaq." ga taí ri.

<sup>8</sup> Hau htâng, Yhang gi, dum ngóm luí, myigùng má kê nyi ri.

<sup>9</sup> Yhangmoq gi, haû su gâ é lé wó gyo kôjáng, je mang bang mai hí luí, rayuq htâng rayuq ló byuq bekô nghut luí, Yesuq baú za myit gyó tô é eq, myiwe myhí haû jâng yap nân tô ri.

<sup>10</sup> Yesuq gi, yap nyhang kat luí, yhang lé, "Myiwe myhí ê, yhangmoq hká ló bekô lhú? Ó yuq èq le, nàng lé mara a byi kó lhú?" ga myí ri.

<sup>11</sup> Yhang gi, "Yhumsîng ê, ó yuq le mara a byi kó nghut ri." ga tû taí ri.

Haú hkûn, Yesuq gi, "Ngò le, nàng lé mara a byi, ló aq hkoi, ahkuí mai mara hkâdum kut shut lo." ga taí kat ri.

### *Yesuq, Mingkân É Maubó*

<sup>12</sup> Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htâng châng é sù ó yuq nghut kôle, mauchut hkaû má

hkâ-nhám le so râ a nghut, asak maubó lé wó râ nghut lhê." ga tâi ri.

<sup>13</sup> Haû mù, haû Hparishe pé gi, "Wú aq, Náng gûng Nàng saksé hkâm yu é nghut ri; Náng é saksé gi, teng râ a nghut." ga tâi akô.

<sup>14</sup> Haú hkûn, Yesuq gi, "Ngá gûng Ngò saksé hkám kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

<sup>15</sup> Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê.

<sup>16</sup> Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haû Ngo lé nhang kat é sù Íwa eq rahá nghut nyi lhê.

<sup>17</sup> Haû nungmoq é tarâ má yhang le, í yuq mai hkâm é saksé gi, têng lhê ga kê tô ri.

<sup>18</sup> Ngò gi, Ngá é matú saksé hkâm yù sù nghut lhê; hau htoq agó, haû Ngo lé nhang kat é sù Íwa le, Ngá é matú saksé hkám byî é nghut lhê." ga tâi ri.

<sup>19</sup> Haû mù, yhangmoq gi, Yhang lé, "Náng Wa gi, hkâmá lhú?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê." ga tâi ri.

<sup>20</sup> Dang haú pé gi, haû noqkuq yhûm wàng hkaú mâ é alu kat jang nàm má, Yhang mhoqshit nyi é u lé tâi é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhâng é ahkyíng a jé shi é yanmai nghut ri.

21 Haû mù luí, Yesuq gi, yhangmoq lé, "Ngò gi, ló byuq râ nghut lhê, haú hkûn, nungmoq Ngo lé hô kó râ, yhumsing é mara má le shî kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taí ri.

22 Hau é yanmai, haû Yudaq byu pé gi, "'Ngò ló é jang má, nungmoq wó jé kó râ a nghut.' gâ é gi, Yhânggùng yhang sat shî râ gâ é nghut lhê lhú?" ga myi bum akô.

23 Nghut kôlhang, Yesuq xoq taí é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shî eq sêng é bang nghut akô; Ngò kúm gi, mingkan shî eq sêng é sù a nghut.

24 Haû mù, nungmoq gi, yhumsing é mara má shî kó râ nghut lhê nghû, Ngò taí é nghut lhê. Ngò gi, haú Yuq nghut lhê nghû taí é lé, nungmoq a lumjínq kô é nghut jáng, nungmoq gi, gè gè yhang, yhumsing é mara má shî kó râ nghut lhê." gâ ri.

25 Haú hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taí nyi bê nghut lhê.

26 Ngò gi, nungmoq eq séng luí, taí râ hkyô eq jéyáng rá hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gû lé, Ngò, mingkan lé taí kyô lhê." ga tú taí ri.

27 Yesuq gi, yhangmoq lé, Yhâng Wa eq séng é hkyô taí kyô nyi é lé, yhangmoq gi, a sê gyo kó nghut ri.

28 Haû mù luí, Yesuq gi, "Haû Byu Yhangzo lé

nungmoq tu shap\* kat é hkûn sheq, Ngò gi, haû Yuq nghut é hkyô lé le, yhumsing myit đông haî le a kut e za, haû Íwa mhoq byî é đông za taî é hkyô lé le, nungmoq sé kó râ nghut lhê.

<sup>29</sup> Haû Ngo lé nhang kat é Sû gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taî ri.

<sup>30</sup> Yhang, haû su taî nyi é u lé lhang, byù myo myo gi, Yhang lé lumjîng bûm bekô nghut ri.

### *Abraham É Awut Ashín Pê Hkyô*

<sup>31</sup> Haû mù, Yesuq gi, Yhang lé lumjîng é Yudaq byu pé lé, "Ngò mhoqshit é hkyô lé châng kut nyî bekô nghut jâng, nungmoq gi, gè gè yhang, Ngá é chángzô pé nghut bekô.

<sup>32</sup> Nungmoq gi, haû tengmán hkyô lé sé kó râ nghut luî, haû tengmán hkyô gi, nungmoq lé lhoq lhut kat râ nghut lhê." ga taî ri.

<sup>33</sup> Haú hkûn, yhangmoq gi, "Ngamoq gi, Abraham é awut ashín pé nghut luî, ó yuq é jùn le hkâ-nhám a dut wú é nghut lhê. Haû mù, 'nungmoq lé lhoq lhut kat râ' nghû Nàng hkâsu kut wó taî lhê lú?" ga tû taî akô.

<sup>34</sup> Yesuq dum tû taî é gi, "Ngò, nungmoq lé teng za taî kôlé, mara kut shut é sù gi, marâ é jùn nghut lhê.

<sup>35</sup> Jùn gi, yhûm ikun eq hkâ-nhám le sêng nyi râ a nghut; zo kúm gi, ikun eq ahtum abyuq sêng lhê.

---

\* **8:28** *Tu shap* gâ é lichyúm gi, tapzîng htoq má jén sat pyám râ gâ é nghut lhê.

36 Haû mù luî, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê.

37 Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat râ dâ akô nghut ri.

38 Ngò gi, Ngá Wâ chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é îwa chyáng mai wó gyô yu é eq rajung za kut nyi akô nghut ri." gâ ri.

39 Haú hkûn, yhangmoq gi, "Ngamoq é îwa gi, Abraham nghut lhê." ga tû taí kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó râ nghut lhê.

40 Nghut kôlhang, nungmoq gi, haû Garai Gasâng chyáng mai wó gyô yu é tengmán hkyô lé taí kyo sù nghut é Ngo lé, sat pyám nau akô nghut ri. Haû sù é hkyô gi, Abraham a kut é nghut lhê.

41 Nungmoq gi, nungmoq é îwa kut é muzó lé yhang, kut nyi akô." ga taí ri.

Haú hkûn, yhangmoq gi, "Ngamoq gi, dezo amyû a nghut; ngamoq gi, Îwa rayuq za wó lhê; haû gi, Garai Gasang nghut lhê." ga taí he akô nghut ri.

### *Zô Wui É A-kyang Gi, Mó Ó Nghut É Hkyô Shit*

42 Yesuq gi, yhangmoq lé, "Garai Gasang gi, nungmoq é Îwa nghut é nghut jáng, nungmoq gi, Ngo lé chyitdap kó râ nghut lhê; hkâsu mù gâ le, Ngò gi, Garai Gasâng chyáng mai lé jé luî, ahkuî, shí má nyi tô é nghut lhê. Ngò gi, Ngá myit dông lé lo

é a nghut, Yhang sheq Ngo lé nhang kat é ru nghut lhê.

<sup>43</sup> Nungmoq gi, haî mù Ngá é dang lé a sê gyo kê é lhu gê le, Ngò taî é dang lé, nungmoq a wô lhom yù kê é yanmai nghut ri.

<sup>44</sup> Nungmoq gi, haû nungmoq é îwa nghut é nat Tsadán eq sêng é bang nghut luî, nungmoq é îwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haû tengmán hkyô má a yap gíng nyi nghut ri. Yhang gi, mhaû é hkûn, yhâng é myit má bo é dông taî ri; hkâsu mù gê le, Yhang gi, byù mhaú nghut luî, mhaú hkyô pê é îwa nghut ri.

<sup>45</sup> Haû su mù, Ngò, nungmoq lé, haû tengmán hkyô taî kyô é yanmai, nungmoq gi, Ngo lé a lumjúng kó nghut ri.

<sup>46</sup> Nungmoq mâ é ó yuq wá, Ngo lé mara bo lhê nghû saksé wô tûn shit akô lhu? Ngò gi, haû tengmán hkyô lé taî nyi é nghut le nhing, nungmoq, Ngo lé haî mù a lumjúng kê é lhu?

<sup>47</sup> Garai Gasang eq sêng é sù gi, Garai Gasang taî é dang lé gyô lhê. Nungmoq a gyo kê é gi, nungmoq, Garai Gasang eq a séng kê é yanmai nghut ri." ga taî ri.

### *Yesuq Eq Abraham*

<sup>48</sup> Haú hkûn, haû Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taî é dang gi, jô lhê a nghut lhu?" ga myí akô.

<sup>49</sup> Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq hkunggâ é ru nghut

lhê; nungmoq kúm gi, Ngo lé taí hpoî nyi akô nghut ri.

<sup>50</sup> Ngò gi, Ngá é matú aróng ho nyi é a nghut; nghut kôlhang, hô byi Sû rayuq nyi lhê, haú yuq jéyáng sháng gaq.

<sup>51</sup> Ngò, nungmoq lé teng za taí kôlé, Ngá dang lé châng é sù gi, hkâ-nhám le, shî râ a nghut." ga taí ri.

<sup>52</sup> Hau é yanmai, haú Yudaq byu pé gi, "Nàng gi, nat gang wang júng to sù nghut é lé, ahkuî, ngamoq sé bê! Abraham gi, shi byuq bê; haú myiqhtoî pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shî râ a nghut.' ga taí ri.

<sup>53</sup> Nàng gi, ngamoq é îwa Abraham htoq hkik lhê l hú? Yhang gi, shi byuq bê; haú myiqhtoî pé le, shi byuq bekô nghut ri. Náng gûng nàng ó yuq su ngàm lhê l hú?" ga taí akô.

<sup>54</sup> Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haú nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê.

<sup>55</sup> Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut le gi, Ngò le nungmoq su byù mhaú dut râ nghut lhê; nghut kôlhang, Ngò gi, Yhang lé sé luî, Yhâng é dang gyo sù nghut lhê.

<sup>56</sup> Nungmoq é îwa Abraham gi, Ngo lé râ buinyi lé myoqbyu gabú nyi é nghut luî, myàng mù, gabú bê nghut ri." ga tû taí ri.

<sup>57</sup> Haú hkûn, haú Yudaq byu pé gi, Yhang lé, "Nàng gi, asak ngo xê zàn l háng a nghut shî é nhîng, Abraham lé myàng wú é nghut lhê l hú?" ga taí akô.



58 Yesuq gi, "Ngò, nungmoq lé teng za tái kôlé, Abraham lháng a hkû shi má, Ngò nyí gù bê nghut lhê." ✧ ga tû tái ri. †

59 Haû mù luî, yhangmoq gi, Yesuq lé, dú râ ga luqgok kui yu akô; nghut kôlháng, Yesuq gi, haû noqkuq yhûm mai haq htoq ló byuq bê nghut ri.

## 9

### *Myoqjit Sû Lé Lhoq Gê Byî É Hkyô*

1 Yesuq gi, sô yông ló nyi é u lé, hku lé é mai myoqjit to gû nghut é byù rayuq lé myang ri.

2 Haú hkûn, Yhâng é chángzô pé gi, Yhang lé, "Rabai ê, shí yuq, myoqjit gû hku lé é gi, ó yuq kut shut é yubak é yanmai nghut lhê lhú? Yhang kut shut é lhú? A nghut jáng, yhâng nu yhâng wa kut shut é lhú?" ga myî akô.

3 Yesuq tû tái é gi, "Haû gi, yhang kut shut é yanmai le a nghut, yhâng nu yhâng wa kut shut é yanmai le a nghut; haû Garai Gasâng é muzó lé, yhang má wó lhoq htoq shit râ matú, haû dut é ru nghut lhê.

4 Nga-nhúng gi, haû Ngo lé nhang kat Su é muzó lé, nyí nghut tô ashî hkûn, zui saî nyi ra râ dut lhê; myín jé jáng gi, ó yuq le, mù wó zui saî râ a nghut.

5 Ngò gi, mingkan htoq má nyi tô é u lé, mingkân é maubó nghut lhê." gâ ri.

6 Yhang gi, haû su ga tái luî, myigùng má sôkan byé hkyó mù, tse-nyhaq saî yù luî, haú yuq é myoqjí má but byî ri.

---

✧ 8:58 Htoq Ló 3:14 † 8:58 Bun zo shî má, Yesuq gi, Yhânggùng yhang Garai Gasang nghut lhê gâ nyi nghut ri.

<sup>7</sup> Hau htâng, haú yuq lé, "Haú Siloam wuìhtum má ê chí pyám aq." ga taí ri. (Siloam gâ é gi, nhang é gâ é lichyúm nghut lhê.). Haú mù, haú yuq gi, ê chí mù, myoq myàng luí, yhùm shut ló bê nghut ri.

<sup>8</sup> Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó l hú?" ga myí bum akô.

<sup>9</sup> Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga taí akô.

Nghut kôlhang, yhang gi, "Ngò, haú yuq yhang nghut lhê." ga taí ri.

<sup>10</sup> Haú hkûn, yhangmoq gi, "Haú nghut le gi, náng myoq hkâsu kut wó myang é l hú?" ga myí akô.

<sup>11</sup> Yhang gi, "Haú Yesuq gâ é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuìhtum má ê chí pyám aq.' ga ngo lé taí ri; haú mù, ngò ê chí pyâm é htâng má, ngá myoq wó myang é nghut lhê." ga tû taí ri.

<sup>12</sup> Haú hkûn, yhangmoq gi, "Byù haú yuq gi, hkâmá nyi ri l hú?" ga, yhang lé myí akô.

Yhang gi, "Ngò a sé." ga taí ri.

### *Myoq Dum Myang Byuq É Hkyô Lé, Hparishe Pé Gôn Wú É Hkyô*

<sup>13</sup> Yhangmoq gi, haú myoqjit wú bê sù lé, Hparishe pé chyáng shuí lé akô.

<sup>14</sup> Yesuq, tse-nyhaq saí yù mù, haú yuq é myoq lé lhoq myâng byí é buinyì gi, Bánno buinyì nghut ri.

<sup>15</sup> Haú mù, yhang, myoq hkâsu kut wó myang é hkyô lé, haú Hparishe pé le dum myí akô. Haú

jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, ê chî pyám jáng, ngá myoq myàng bê nghut lê." ga tû tái ri.

<sup>16</sup> Haú Hparishe pé ra-am gi, "Shí yuq gi, Bánno buinyi é tarâ lé a châng é sù nghut é yanmai, Garai Gasâng chyáng mai lé é sù a nghut." ga tái akô.

Nghut kôlhang, ra-am gi, "Yubak dap sù rayuq gi, haú su é limik kumlhá pé lé, hkâsu wó kut htoq râ l hú?" ga myí akô. Haú mù, yhangmoq gi, myit a huí l hùm bùm lò kó nghut ri.

<sup>17</sup> Haú mù, yhangmoq gi, haú myoqjít wú sù shut l hîng mù, "Nang lé myoq lhoq myâng byí é sù gi, hkasú é byù nghut lê nghû, nàng tái râ l hú?" ga dum myí kôjáng, "Yhang gi, myiqhtoi rayuq nghut ri." ga, yhang tû tái ri.

<sup>18</sup> Haú Yudaq byu pé gi, haú yuq myoqjít wú é hkyô lé le, ahkuí myoq dum myàng bê nghut é hkyô lé le, haú yhâng nu eq yhâng wa lé, ê jì lò nhang é hkûn jé shoq, a lumjîng kó nghut ri.

<sup>19</sup> Haú mù, Yhangmoq gi, haú yhâng nu eq yhâng wa lé, "Shí yuq gi, nungnhik é yhangzo nghut lê l hú? Hku lé é hkûn mai, myoqjít gù nghut lê l hú? Yhang, ahkuí, hkâsu kut wó myang é l hú?" ga myí akô.

<sup>20</sup> Haú hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjít gù nghut é lé le, ngá-nhik sê lê.

<sup>21</sup> Nghut kôlhang, yhang, ahkuí hkâsu kut wó myang é hkyô lé le, yhâng é myoq lé ó yuq eq lhoq myâng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat tái kyo râ nghut lê." ga tû tái akô.

22 Haú yhâng nu eq yhâng wâ nhik gi, Yudaq byu pé lé gyuq kô é yanmai, haú su ga tái kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sù, ó yuq lé nghut kôle, haú tarajong mai lhoq htoq pyám râ nghut lhê ga, haú Yudaq suwún wuê chôm myit hpyit to bekô nghut é yanmai nghut ri.

23 Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga tái kô é nghut ri.

24 Haú Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga tái akô.

25 Haú hkûn, yhang tû tái é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gâ ri.

26 Hau htâng, yhangmoq gi, "Yhang, nang lé haí kut byí ri lhú? Náng é myoq lé, yhang, hkâsu kut lhoq myâng byí ri lhú?" ga, yhang lé myí akô.

27 Haú hkûn, yhang gi, "Ahkuí za, ngò, nungmoq lé tái kyo bê le, nungmoq sheq a gyo kôluí nhing! Nungmoq gi, haí mù dum gyô nau akô lhú? Nungmoq le, Yhâng é chángzô pé dut nau akô lhú?" ga tái myí ri.

28 Haú mù, yhangmoq gi, yhang lé gyaí rhoí é đông mai, "Nàng gi, haú yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê!

29 Garai Gasang gi, Mosheq lé dáng nyo é hkyô lé, ngamoq sê lhê; nghut kôhang, haú yuq eq séng luí,

Yhang gi, hkâmai lé é sù nghut é lé lhang, ngamoq a sé." ga taí akô.

<sup>30</sup> Haú hkûn, haú yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê!

<sup>31</sup> Garai Gasang gi, yubak dap bâng é dang lé a gyo byi é hkyô lé, nga-nhúng sê lhê. Garai Gasang gi, Yhang lé noqkuq lui, Yhâng ô nau é hkyô lé, kut é sù é dang lé kúm gyo byi lhê.

<sup>32</sup> Hku lé é hkûn mai myoqjit gù nghut é byù lé, ó yuq eq myoq lhoq myâng byi é gâ é hkyô lé, mingkan lé joq é hkûn mai, ó yuq le a wó gyô wú é nghut lhê.

<sup>33</sup> Haú yuq gi, Garai Gasâng chyáng mai lé é sù za a nghut le gi, haí le wó kut râ a nghut." ga tú taí ri.

<sup>34</sup> Haú su ga jáng, yhangmoq gi, "Nàng gi, yubak htui má hku lé é sù nghut to lui nhîng, ngamoq lé wám mhoqshit lhê lú?" ga tú taí kôlui, yhang lé hkat htoq pyâm akô nghut ri.

### *Woi-nyí Má Myoqjit É Hkyô*

<sup>35</sup> Yesuq gi, haú yuq lé yhangmoq hkat htoq pyâm é hkyô lé wó gyo lui, yhang lé myàng hui jáng, "Nàng gi, haú Byu Yhangzo lé lumjîng lhê lú?" ga myí ri.

<sup>36</sup> Haú hkûn, haú yuq gi, "Yhumsîng ê, haú gi, ó yuq nghut lhê lú? Yhang lé, ngò wó lumjîng sháng gaq, taí kyo laq." ga myí ri.

<sup>37</sup> Yesuq gi, "Nàng, haú yuq lé myàng wú bê nghut lhê; ahkuí, nàng eq dáng nyo nyi é sù gi, haú yuq yhang nghut lhê." ga taí ri.

38 Haû mù, haú yuq gi, "Yhumsîng ê, ngò lumjîng lhê!" ga taí luí, Yhang lé noqkuq ri.

39 Haú hkûn, Yesuq gi, "Haû myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shî má Ngò jé lé é nghut lhê." ga tâ ri.

40 Yhang eq rahá nghut nyi é Hparishe pé ra-am gi, Yhang haû su ga taí é lé wó gyo kôjáng, "Hkâsu htà? Ngamoq gi, myoqjit bang dut bê lhú?" ga myî akô.

41 Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashî kó nghut ri.

## 10

### *Sau Zúng Sû Eq Sau Hpúng*

1 Ngò, nungmoq lé teng za taí kôlé, haû sau hkup má, hkúmdong mai a wang e za, gó hkyô dông doq lut wang é sû gi, hkau sû eq damyaq nghut ri.

2 Haû hkúmdong mai wang é sû kúm gi, sau zúng sû nghut ri.

3 Haû hkum zúng sû gi, yhang lé hkum hpóng byí é htoq agó, haû sau pé gi, yhâng é htê lé gyo byí akô. Yhang gi, yhâng é sau pé lé, myìng lang luí wut yù mù, yhangmoq lé shuí htoq htoq kut nyi ri.

4 Yhâng é sau pé banshoq lé hpông htoq yù mù, yhang gi, hí má sô ri; sau pé gi, yhâng é htê lé sê gyo kô é yanmai, yhâng é htâng má châng akô nghut ri.

5 Nghut kôlhang, yhangmoq gi, byù bíng é htâng má, hkâ-nhám lhang cháng kó râ a nghut e za,

yhâng chyáng mai kúm h pang byuq kó râ nghut lhê; hkâsu mù gâ le, haû byù bíng é htê lé, yhangmoq a sê gyo kô é yanmai nghut ri." ga taí ri.

<sup>6</sup> Yesuq gi, dangtú haû lé yù mù, yhangmoq lé taí kyô ri; nghut kôlhâng, yhangmoq gi, Yhang haí taí kyô nyi é lé, a sê gyo kó nghut ri.

<sup>7</sup> Haû mù, Yesuq dum taí é gi, "Ngò, nungmoq lé teng za taí kôlé, Ngò gi, haû sau pé wang é hkúmdong nghut lhê.

<sup>8</sup> Ngá é hí má lé é lhunglhâng bang gi, hkau bang eq damyaq pé nghut akô; haû sau pé kúm gi, yhangmoq é dang lé a lhom gyo byi kó nghut ri.

<sup>9</sup> Ngò gi, hkúmdong nghut lhê; Ngò mai wang é sù ó yuq nghut kôle, hkyi yu é hui râ nghut lhê. Haú yuq gi, htoq htoq wàng wàng wó kut râ eq mhan-yô myang hô râ nghut lhê.

<sup>10</sup> Haû hkau sù gi, hkau râ, sat râ eq lhoq htên pyám râ matú, lé e za nghut lhê. Ngo lé é gi, yhangmoq, asak wó yû râ eq byíngjup é asak lé wó yû râ matú sheq nghut lhê.

<sup>11</sup> Ngò gi, ge é sau zúng sù nghut lhê; haû ge é sau zúng sù gi, sau pé é matú, yhumsing é asak lé ap byi pyâm é nghut lhê.

<sup>12</sup> Haû langchyáng kut sù gi, sau pé lé sing é sau zúng sù a nghut; haû mù, yhang gi, haû wamhkui lé lo é lé myàng jáng, saû pé lé pyâm to mù h pang ló byuq râ nghut lhê; haú hkún, wamhkui gi, sau hpúng lé ê htím luí, lhoq pyo pyám râ nghut lhê.

<sup>13</sup> Yhang gi, langchyáng hpó nghut luí, haû sau pé é matú haí le a myit chiq byí é yanmai, h pang é nghut ri.

<sup>14</sup> Ngò gi, haû ge é sau zúng sù nghut lhê; haû Íwa

gi, Ngo lé sê é nghut luî, Ngò le, haû Îwa lé sê é eq rajung za,

<sup>15</sup> Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haû sau pé é matú, yhumsing é asak lé ap byî pyâm é nghut lhê.

<sup>16</sup> Ngò gi, sau hkup shî mâ é a nghut é gotû sau pé wó ashî; sau haú pé lé le, Ngò, shuí yù ra râ nghut lhê; sau haú pé le, Ngá é htê lé gyo kó râ nghut lhê; haú hkûn, sau hpúng rahpúng za dut luî, sau zúng sù le rayuq za, nghut râ nghut lhê.✧

<sup>17</sup> Ngò gi, Ngá é asak lé dum wó taû yù sháng gaq nghû, yhumsing é asak lé ap byî pyâm é yanmai, Ngá Wa gi, Ngo lé chyitdap é nghut lhê.

<sup>18</sup> Ngá é asak lé, ó yuq èq le wó yu pyâm é a nghut, Ngá é myit dông byi pyâm é ru nghut lhê. Ngò gi, yhumsing asak lé ap byi pyâm râ ahko ahkáng eq haû lé dum taû yù râ ahko ahkáng wó sù nghut lhê. Haû gi, Ngá Wá chyáng mai Ngò wó yu é hkunmó nghut lhê." gâ ri.

<sup>19</sup> Dang haú pé é yanmai, haû Yudaq byu pé gi, myit a huî lhum dum dut byuq bekô nghut ri.

<sup>20</sup> Haú mâ é bang myo myo gi, "Yhang gi, nat gang wang júng to luî, nâ byuq bê nghut ri. Yhâng é dang lé, haî mù gyô nyi akô lhú?" ga taí bum akô.

<sup>21</sup> Nghut kôhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myâng nhâng râ lhú?" ga taí bum akô nghut ri.

### *Yudaq Byu Pé A Lumjǐng Kô É Hkyô*

<sup>22</sup> Yerusalem wà mó má, Ap Nóng Poi\* jé bê

---

✧ **10:16** Esai 56:8      \* **10:22** Ap Nóng Poi gâ é gi, Garai Gasâng é yhûm lé ap nóng lé gâ lhê.



nghut ri. Haû gi, gyoqmyò nám nghut ri.

<sup>23</sup> Haú hkûn, Yesuq gi, haû noqkuq yhûm wàng mâ é, Sholumon é Jirop má sô yông wún ri.

<sup>24</sup> Haú u lé, haû Yudaq byu pé gi, Yhâng é lhinghkyuq má lé zîng bùm kômù, "Nàng gi, ngamoq lé hkâ-myháng jé shoq úng-áng nhang nyì râ lú? Nàng, Hkrisduq nghut le gi, ngamoq lé san za taí kyô pyám laq." ga taí akô.

<sup>25</sup> Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjîng kó nghut ri. Ngá Wâ é myîng mai, Ngò kut é laklaí kumlhá haú pé gi, Ngá é matú saksé hkám byî nyi ri.

<sup>26</sup> Nghut kôlhang, nungmoq gi, Ngá é sau a nghut kô é yanmai, a lumjîng kó nghut ri.

<sup>27</sup> Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htâng châng akô nghut ri.

<sup>28</sup> Ngò gi, yhangmoq lé, ahtum abyuq é asak byî é nghut mù, yhangmoq gi, hkâ-nhám le htên byoq kó râ a nghut; ó yuq èq le, yhangmoq lé, Ngá é loq mai wó lú yû râ a nghut.

<sup>29</sup> Yhangmoq lé, Ngá é loq má ap byi tô é sù, haú Ngá Wa gi, lhunglhang htoq má je gyaú Sû nghut lhê; ó yuq èq le, yhangmoq lé, Ngá Wâ é loq mai wó lú yû râ a nghut.

<sup>30</sup> Ngò eq haú Îwa gi, rayuq za nghut lhê." ga tú taí ri.

<sup>31</sup> Haú hkûn, haû Yudaq byu pé gi, Yesuq lé, dú râ matú luqgok dum kui akô.

<sup>32</sup> Nghut kôlhang, Yesuq gi, yhangmoq lé, "Haú Îwâ chyáng mâ é laklaí kumlhá mó pé myo myo, Ngò, nungmoq lé tân shit bê nghut lhê. Nungmoq,

Ngo lé dú râ gi, hká lhûm é yanmai nghut akô lhú?" ga myî ri.

<sup>33</sup> Haû Yudaq byu pé gi, "Ngamoq, Nang lé dú râ gi, haú pé hká lhûm é yanmai le a nghut; Nang gi, byù rayuq nghut to luî, Garai Gasang nghut é đông táí whuí luî, Yhang lé rhoî dang taî é yanmai, dú râ nghû lhê." ga tû taî akô.

<sup>34</sup> Haú hkûn, Yesuq gi, yhangmoq lé, "'Nungmoq gi, garaí pé nghut akô nghû, Ngò táí bê nghut lhê.'<sup>✧</sup> ga nungmoq é tarâ má kê to lhê a nghut kó lhú?

<sup>35</sup> Chyúmdang haû lé gi, a ge lhoq hpyoq pyâm é nghut luî, haû Garai Gasang é mungdang lé wó yu é bang lé, 'garaí pé' gâ é nghut le gi,

<sup>36</sup> haû Íwa mai, Yhang é matú hkyin htoq yû luî, mingkan má nhang é Sû eq séng luî gi, hká đông nghû kó râ lhú? 'Ngò gi, Garai Gasang é Yhangzo nghut lhê.' nghû taî é yanmai, Ngò gi, Garaí Gasang lé taî hpoî ri nghû, nungmoq, haî mù Ngo lé mara hûn akô lhú?

<sup>37</sup> Ngá Wâ é muzó pé lé, Ngò kut é a nghut jáng, Ngo lé hkâlumjínng kó.

<sup>38</sup> Nghut kôlhang, Ngò, haú pé lé kut é nghut le gi, nungmoq, Ngo lé a lumjínng kôlhang, haû muzó pé lé lumjínng keq; haú hkûn, haû Íwa gi, Ngò má nghut nyi é hkyô lé le, Ngò gi, haû Íwa má nghut nyi é hkyô lé le, nungmoq wó sé luî, sê gyo kó râ nghut lhê." ga tû taî ri.

<sup>39</sup> Yhangmoq gi, Yhang lé chyup râ dum hen akô; nghut kôlhang, Yhang gi, yhangmoq é loq mai wó lut ló bê nghut ri.

---

✧ 10:34 Hkya-on 82:6

<sup>40</sup> Hau htâng, Yesuq gi, haû Yodan làng he hpoq mâ é, Yohan, wui-myhup hkám byî hi é jowò má ló jé ri. Haû má, Yhang nyi nyi é nghut luí,

<sup>41</sup> byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôlhang, shí yuq eq séng luí, Yohan taí é hkyô lhunglhang gi, têng ri." ga taí bum akô.

<sup>42</sup> Haú jowò má, byù myo myo gi, Yesuq lé lumjínq bùm bekô nghut ri.

## 11

### *Lazaruq Shi Byuq É Hkyô*

<sup>1</sup> Ahkuí, Lazaruq gâ é byù rayuq gi, no nyi ri. Yhang gi, haû Mariq eq yhângnhá Mahtaq nhik nyi é Behtani wà má é sù nghut lhê.

<sup>2</sup> Mariq haû gi, Yhumsíng lé namngón-xû hut gyun luí, hkyî má yhâng xam èq sùt byî é sù nghut ri; yhang gi, haû no nyi é Lazaruq é yhângnhá nghut ri.

<sup>3</sup> Haû mù, haû yhângnhá nhik gi, "Yhumsíng ê, Nàng chyitdap é sù gi, no nyi ri." ga, Yesuq chyáng ê taí nhang akô.

<sup>4</sup> Yesuq gi, dang haû lé wó gyo jáng, "Nòhpyo haû gi, shî-nô a nghut. Haû Garai Gasâng é Yhangzo gi, hau é yanmai, hpungwup shingkang wó dan hú é hui sháng gaq ga, Garai Gasâng é hpungwup shingkang é matú dut é ru nghut lhê.

<sup>5</sup> Yesuq gi, Mahtaq eq yhanggu Mariq lé le, Lazaruq lé le, chyitdap ri.

<sup>6</sup> Haû su mù, Yhang gi, haû Lazaruq no nyi ri gâ é lé, wó gyô é hkûn, haû Yhang nyi é jowò má, í nyí nyi tô ashî nghut ri.

7 Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taû ló sháng." ga taî ri.

8 Haú hkûn, yhangmoq gi, "Rabai ê, hkû-yoq za, haú Yudaq byu pé, Nang lé luqgok èq dú sat râ da kô é nghut le nhîng, ahkuî, haú shut dum taû ló râ lúhú?" ga Yhang lé myî akô.

9 Yesuq gi, "Nyí gi, hkyíng hkum raxe í hkum bo lhê a nghut kó lúhú?\*" Nyí má hkyô sô é sù gi, mingkan shi é maubó é yanmai myoq myàng luî, lengbat râ a nghut.

10 Myín lé hkyô sô é sù kúm gi, maubó lé a wó é yanmai, lengbat lhê." ga tû taî ri.

11 Haú su ga taî é htâng má, Yhang, yhangmoq lé xoq taî kyô é gi, "Nga-nhúng é luzúm Lazaruq yhup myhî byuq bê nghut ri; nghut kôlhang, Ngò gi, yhang lé ê nhaú toq râ nghut lhê." gâ ri.

12 Haú hkûn, Yhâng é chángzô pé gi, "Yhumsíng ê, yhang yhup myhî tô é nghut le gi, ge lò râ nghut lhê." gâ taî akô.

13 Yesuq gi, Lazaruq shi byuq bê hkyô lé taî é nghut ri; nghut kôlhang, Yhâng é chángzô pé gi, gè gè yhup myhî tô é lé taî é su ngam pyâm akô nghut ri.

14 Haú mù luî, Yesuq, yhangmoq lé san za jáng taî kyô é gi, "Lazaruq gi, shi byuq bê nghut lhê.

15 Ngò haú má a nyi záng é gi, nungmoq wó lumjíng râ matú nghut luî, nungmoq é matú Ngò gabú byî ri; yhâng chyáng e ló sháng hkoi." gâ ri.

---

\* **11:9** Nyí gi, hkyíng hkum raxe í hkum bo lhê a nghut kó lúhú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

16 Haû mù, haû Zozûm le gê é Htomaq gi, gotû chángzô pé lé, "Nga-nhúng le, Yhang eq rahá shî sháng gaq, cháng e ló sháng." ga tâi ri.

*Haû Î-nhâ Nhik Lé, Yesuq Nhik Tîng É Hkyô*

17 Yesuq gi, jé e é hkûn, haû Lazaruq lé lup má kat pyâm é myi nyí nghut bê hkyô lé, lhom tâi kyô akô.

18 Behtani wà gi, Yerusalem wà mó eq í déng kô za wê lhûm ri.

19 Haû mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó râ ga lé jé nyi bum akô nghut ri.

20 Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé ê huî ri; nghut kôlhang, Mariq gi, yhûm má nyi tô ri.

21 Mahtaq gi, Yesuq lé, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut.

22 Nghut kôlhang, ahkuî le, Garai Gasâng chyáng Nàng haî dung kôlhang, Yhang byi râ nghut é lé, ngò sê lhê." ga tâi ri.

23 Yesuq gi, yhang lé, "Nung gu, dum dui toq râ nghut lhê." ga tâi ri.

24 Haú hkûn, Mahtaq gi, "Haû jihtûm buinyi má dum dui toq é hkûn, yhang le dum dui toq râ nghut é lé, ngò sê lhê." ga tâi ri.

25 Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjîng é sù gi, shi byuq kôlhang, dum dui râ nghut lhê.

26 Asak dui nyi luî, Ngo lé lumjîng é sù ó yuq nghut kôle, hkâ-nhám le shi é hui râ a nghut. Nàng gi, dang shî lé lumjîng lhê lú?" ga tâi ri.

27 Haú hkûn, yhang gi, "Yhumsîng ê, ngò lumjîng lhê. Nàng gi, haú mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjîng lhê." ga, Yhang lé taí kyô ri.

28 Yhang gi, haú su ga taí é htâng má, taú ló mù, yhanggu Mariq lé, tsik za wut yù luí, "Haú Sará jé tô ri; Yhang gi, nang lé myî nyi ri." ga taí kyô ri.

29 Mariq gi, haú lé wó gyo jáng, hân za toq mù, Yesuq chyáng é bê nghut ri.

30 Haú u lé, Yesuq gi, haú wâ hkaú má a wang ló shî e za, Mahta q eq huí é jowò má ru nyi tô ashî nghut ri.

31 Haú yhúm hkaú má, Mariq lé nhik tîng nyi é Yudaq byu pé gi, yhang hân za toq luí, htoq ló é lé myàng kô jáng, yhang, lup má é ngaú râ dâ lhê abe ga, myit yù kômù, yhang htâng châng e ló bum akô nghut ri.

32 Mariq gi, Yesuq nyi tô é jang má jé mù, Yhang lé myàng jáng, Yhâng é hkyî wang má ngóm gop to luí, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut." ga taí ri.

33 Yesuq gi, Mariq ngaú nyi é lé le, haú yhang eq rahá lé lo é Yudaq byu pé ngaú nyi kô é lé le, myàng jáng, Yhâng é myit má gyai yhang hkâm zo wuí é eq myit wui myit hke dut nyi ri.

34 Haú mù, Yhang gi, "Yhang lé, hkâmá tô tô akô lhú?" ga myi jáng, yhangmoq gi, "Yhumsîng ê, lé wú wú aq." ga tû taí akô.

35 Yesuq gi, ngaú bê nghut ri.

---

† 11:27 Hkrisduq lé Mesaia le gâ lhê.

<sup>36</sup> Haû mù, haû Yudaq byu pé gi, "Wú keq, Yhang gi, Lazaruq lé, haû-í yhang chyit ri-nhung!" ga taí akô.

<sup>37</sup> Nghut kôlhang, ra-am gi, "Haû myoqjit sù lé, myoq wó lhoq myâng byî é Sù gi, shí yuq lé le, a shí lo shoq a wó kut é lú?" ga taí bum akô nghut ri.

### *Lazaruq Lé Lhoq Dui Toq É Hkyô*

<sup>38</sup> Yesuq gi, Yhâng é myit má radàm dum gyai yhang hkâm zo wuî é èq, lup má lé jé ri. Lup haû gi, luqhkýûng dong nghut luî, luqgok rachâm èq chî tô akô.

<sup>39</sup> Haû mù, Yhang gi, "Luqgok haû lé yu pyám keq." ga taí ri.

Haú hkûn, haû shi byuq su é yhângnhá Mahtaq gi, "Yhumsîng ê, yhang lé, haú má tô tô é myi nyí lhang nghut bê yanmai, ahkuî gi, bup nàm berâ nghut lhê." ga taí ri.

<sup>40</sup> Haû mù, Yesuq gi, "Nàng, lumjîng é nghut le gi, haû Garai Gasâng é hpungwup shingkanq lé, wó myâng râ nghut lhê nghû, Ngò, nang lé taí kyô wú bê a nghut lú?" ga taí ri.

<sup>41</sup> Haû mù luî, yhangmoq gi, luqgok haû lé yu pyâm akô. Hau htâng, Yesuq gi, mauhkûng shut tu wú luî, "Âwa ê, Nàng, Ngá é dang lé gyo byî é yanmai, Ngò, Nang lé jeju hkya-ôn lhê.

<sup>42</sup> Nàng gi, hkâ-nhám le, Ngá é dang lé gyo byî nyi é lé, Ngò sê lhê; nghut kôlhang, Nàng, Ngo lé nhang kat é hkyô lé, shí má yap tô é bang lumjîng kó sháng gaq nghû, yhangmoq é matú, Ngò, isu nghû taí é nghut lhê." ga taí ri.

<sup>43</sup> Yhang gi, haû su ga taí luî, "Lazaruq ê, htoq lô aq." ga htê mó èq wut kat ri.

<sup>44</sup> Haú hkûn, haû shi byuq bê sù gi, yhâng é loq hkyî pé má pân èq htup yup to gû eq, yhâng é myoqdong má hpajet èq htup to gù htoq lo ri.

Haû mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taí ri.

*Yesuq Lé Sat Pyám Râ Haq Dâ É Hkyô*

*Mht 26:1-5; Mrk 14:1-2; Luk 22:1-2*

<sup>45</sup> Haû mù luî, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjúng bùm bekô nghut ri.

<sup>46</sup> Nghut kôlhang, yhangmoq chyáng mâ é ra-am gi, haû Hparishe pê chyáng ló mù, Yesuq kut é hkyô lé, ló taí kyô akô.

<sup>47</sup> Haû mù, haû hkyangjong agyi pé eq Hparishe pé gi, Yudaq byìn tú wapdoq‡ zuphpong lé ji tsíng to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè râ lúh?

<sup>48</sup> Nga-nhúng, Yhang lé haû su ru kut nyî nhang é nghut jáng, yuq hkanmó gi, Yhang lé lumjúng kó râ nghut lhê; haú hkûn, Romaq byu pé gi, jé lé mù, nga-nhúng é jowò eq nga-nhúng é byuhú lé, lé lhoq htên pyám kó râ nghut lhê." ga taí akô nghut ri.

<sup>49</sup> Haú hkûn, yhangmoq chyáng mâ é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lhang a sé kó nghut ri-nhung!

<sup>50</sup> Haû byuhú gón htên byoq byuq râ htoq má, byuhú hau é matú, byù rayuq shí hkâm byi le gi,

‡ **11:47** Yudaq byìn tú wapdoq lé Grik đông gi, San-hedrin gâ lhê.



nungmoq é matú je gè râ hkyô lé, nungmoq, a myit jé kó nghut ri." ga tai kat ri.

<sup>51</sup> Yhang haú su ga tai é gi, yhumsing myit dông a nghut e za, haú zân má, yhang gi, hkyangjong mó nghut é eq rajung za, haú Yudaq byuhú é matú, Yesuq shí hkám byi râ nghut é hkyô lé le,

<sup>52</sup> byuhú hau é matú baú a nghut e za, haú byo myín tô é, Garai Gasâng é yhangzô pé lé, shuí tsíng yù mù, rading ralhum za dut nhâng râ matú, shí hkám byi râ nghut é hkyô lé le, myiqhtoi dang tai é ru nghut lhê.

<sup>53</sup> Haú nyí mai, yhangmoq gi, Yesuq lé sat râ matú chôm da bekô nghut ri.

<sup>54</sup> Hau é yanmai, Yesuq gi, Yudaq byu pê gyoro má, de de a sô shit wún e za, haú mai htoq luí, haú yoso eq chyâng lhûm é mau mâ é, Ehprim gâ é wà má ê mù, Yhâng é chángzô pé eq rahá nyi nyi ri.

<sup>55</sup> Haú Yudaq byu pê é Lhoqlhai Poí jé râ za nghut é hkún, byù myo myo gi, Lhoqlhai Poí a jé shí má, lhoq san lhoq yúng hking dông yhumsing gùng lé lhoq sân-yúng yû râ matú, yosô wà pé mai, Yerusalem wà mó shut doq ló bum akô.

<sup>56</sup> Haú mù, yhangmoq gi, Yesuq lé ho nyi kô é nghut luí, haú noqkuq yhûm wàng má yap to uchyang, rayuq eq rayuq, "Nungmoq, hkâsu wó myit akô lhú? Yhang gi, Poí má a lé lô râ gâ lhê là?" ga myí lhûm bum akô.

<sup>57</sup> Nghut kôlhang, haú hkyangjong agyi pé eq Hparishe pé gi, Yesuq lé wó chyup yû râ matú, Yesuq hkámá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

# 12

*Yesuq, Namngón-xû But Byi Huí É Hkyô  
Mht 26:6-13; Mrk 14:3-9*

<sup>1</sup> Haû Lhoqlhai Poî jé râ hkyuq nyí râ ashî hkûn, Yesuq gi, Yhâng èq shi é mai lhoq dui toq yu é sù, Lazaruq nyi é Behtani wà má ló jé ri.

<sup>2</sup> Haû má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haû Yesuq eq rahá siboî má zô zung nyi bang mâ é rayuq nghut ri.

<sup>3</sup> Haú hkûn, Mariq gi, haû nardu amyit mai za saî yu é, gyai hpaû é namngón-xû raxe í rûng kô yu lé mù, Yesuq é hkyî má hut gyun byi luî, yhâng é uxam èq sùt byî ri. Haû mù, yhûm haû gi, namngón-xû shôm byíng to bê nghut ri.

<sup>4</sup> Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi,

<sup>5</sup> "Haû myùng bang lé byî pyám râ matú, haû namngón-xû lé denari sum sho èq haî mù a ûng pyâm é lhú?" ga taî ri.

<sup>6</sup> Yhang haû su ga taî é gi, myùng bang lé chiq byî é yanmai taî é a nghut, yhang gi, ngùn htûng chûng sù nghut luî, haú má kat tô é ngùn lé, yhumsing é matú lhaq yu chûng chûng kut é, hkau sù nghut é yanmai taî é nghut ri.

<sup>7</sup> Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xû shî lé hkong to byî é nghut lhê.

<sup>8</sup> Haû myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut." ga tû taî ri.

<sup>9</sup> Haú u lé, Yudaq byu pé ajùm ayò gi, haú má Yesuq nyi é lé sé kôluî, lé lo akô; haú bang gi, Yesuq é yanmai za lé kô é a nghut, haú Yhâng eq shî bê mai lhoq dui toq yu é Lazaruq lé, lé myâng naù kô é yanmai le nghut ri.

<sup>10</sup> Haù mù, haù hkyangjong agyi pé gi, Lazaruq lé le, sat pyám râ matú chòm hpyê lhùm akô.

<sup>11</sup> Hkâsu mù gâ le, yhâng é yanmai, haù Yudaq byu pé myo myo gi, Yesuq chyáng lhing ló kômù, Yhang lé lumjínng bùm kô é yanmai nghut ri.

*Yesuq, Yerusalem Wà Mó Má Wang E Ló É Hkyô  
Mht 21:1-11; Mrk 11:1-11; Luk 19:28-40*

<sup>12</sup> Hau htang nyí, haù Poî má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akô.

<sup>13</sup> Haù mù, yhangmoq gi, byùm-haq pé yu chùng mù, Yhang lé ê tê uchyang,

"Hosana!"\*

Haù Yhumsing é myìng mai jé lé lô Sù gi, hkungsô wó nyí sháng gaq ô!

Haù Israelaq byu pé é Hkohlâm gi, hkungsô wó nyí sháng gaq!"<sup>☆</sup>  
ga, taì garû bum akô nghut ri.

<sup>14</sup> Haú hkùn, Yesuq gi, logúng zo radu lé myàng luî, doq jí ri;

---

\* **12:13** Hebre dang má, *hosana* gâ é gi, "ahkuî hkyi yù aq" gâ é nghut lhê. Nghut kôlhang, bun zo shî má gi, hkya-on dang dòng chung é nghut lhê. ☆ **12:13** Hkya-on 118:25-26

15 haû gi, "Zi-un byizo<sup>†</sup> ê, hkâgyuq; wú keq, nung-moq é hkohkâm gi, logúng zo má ji mù lé lo nyi ri."<sup>☆</sup>

ga, kê tô é eq rajung za nghut ri.

16 Haú pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shingkang dan hu huí é htâng má za sheq, haú pé gi, Yhang eq séng luí kê tô é hkyô lé le, haú eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

17 Haû Yesuq gi, lup hkaû mã é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haú hkyô lé, saksé hkâm byî nyi akô.

18 Haû mù, byù myo myo gi, Yesuq tân shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akô.

19 Hau é yanmai, haû Hparishe pé gi, "Wú keq, nga-nhúng, hkâsu yhang a ge kut lo nhung! Haû mingkan gón gi, Yhâng htâng châng bùm bekô." ga, rayuq eq rayuq taí lhùm bum akô nghut ri.

### *Yesuq, Yhang Shî Râ Hkyô Lé Te Taí É Hkyô*

20 Haú hkûn, noqkuq râ matú Poí má doq ló é bang má, Grik pé ra-am le bo tô akô.

21 Yhangmoq gi, Galile mau, Bet-saida wà mó mã é Hpilip chyáng lé jé kômù, "Áhkaú ê, ngamoq gi, Yesuq lé myàng nau ri." ga, dung tôngbán akô.

22 Haû mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

<sup>†</sup> 12:15 Hebre myíng dông Zi-un byizo gâ é gi, Yerusalem mã é byu pé lé gâ é nghut lhê. <sup>☆</sup> 12:15 Zhk 9:9

<sup>23</sup> Haû mù, Yesuq gi, "Haû Byu Yhangzo gi, hpungwup shingkang dan hû é hui râ matú, ahkyíng jé bê nghut ri.

<sup>24</sup> Ngò, nungmoq lé teng za taí kôlé, sungso racham gi, myigùng má gyó luí, shi byuq e za a nghut jáng, acham roq za dut nyì râ nghut lhê. Nghut kôhang, shi byuq é nghut le gi, ashì myo myo lhoq htoq râ nghut lhê.

<sup>25</sup> Haû yhumsing é asak lé chyitdap é sù gi, asak sùm byuq râ nghut lhê. Mingkan shì má, haû yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê.

<sup>26</sup> Ngo lé dojaú é sù ó yuq nghut kôle, Ngá htâng cháng râ lhê; Ngò, hkâmá nyi le, Ngá é dui-nhâng zoshâng le nyì râ nghut lhê. Ngá Wa gi, haû Ngo lé dojaú é sù lé, shigyaú râ nghut lhê.

<sup>27</sup> Ahkuí, Ngò, myit wuîhke nyi ri; Ngò hkâsu nghû taí râ lhi? 'Áwa ê, ahkyíng shì mai Ngo lé lhoq lhut yù laq.' nghû taí râ l hú? Nghut kôle, Ngò gi, ahkyíng shì é matú za sheq jé lé é ru nghut lhê.

<sup>28</sup> Áwa ê, Náng é myìng lé hpungwup shingkang dan hu nhâng aq hkoi!" ga taí ri.

Haú hkûn, "Ngò gi, Ngá é myìng lé hpungwup shingkang dan hu nhâng bê nghut luí, dum dan hu nhâng shirâ nghut lhê." gâ é htê, mauhkûng mai htoq lo ri.

<sup>29</sup> Haû má nyi tô é byù moq mó gi, haû lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

30 Haú hkûn, Yesuq gi, "Danghtê shî gi, Ngá é matú a nghut, nungmoq é matú ru nghut lhê.

31 Ahkuî gi, mingkan shî lé jéyáng râ ahkýing nghut bê; mingkan shi é zau gi, ahkuî hkat htoq pyâm é hui râ nghut lhê.

32 Nghut kôlhang, Ngò gi, myigùng mai tu shap kat é huî é hkûn, byù lhunglhang bang lé, Ngá chyáng shê yù râ nghut lhê." ga taî ri.

33 Yhang haû su ga taî é gi, Yhang hkâsu kut shî râ nghut é hkyô lé shit é nghut ri.

34 Haú hkûn, haû byù moq mó gi, "Haû tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhîng, 'Haû Byu Yhangzo gi, tu shap é hui ra râ nghut lhê.' nghû, Nàng hkâsu kut wó taî lhê lú? Haû Byu Yhangzo gi, ó yuq nghut lhê lú?" ga, myî akô.

35 Haû mù, Yesuq gi, yhangmoq lé, "Nungmoq chyáng, haû maubó joq nyi râ ahkýing gi, a lúm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haû maubó joq nyi ashî hkûn sô nyi keq; hkâsu mù gâ le, haû mauchut má sô nyi é sù gi, yhang hká shut e ló nyi é lé, a sé nghut ri.

36 Nungmoq gi, maubó é yhangzô pé wó dut kó sháng gaq, haû maubó joq nyi ashî hkûn, haû lé lumjîng keq." ga taî ri. Yesuq gi, dang haû ban taí jáng, yhangmoq chyáng mai htoq ló luí, haq byuq bê nghut ri.

*Yudaq Byu Pé, A Lumjîng Ru Dut Nyî Kô É Hkyô*

<sup>37</sup> Yesuq gi, yhangmoq é hí má, limik kumlhá haú pé banshoq kut shit kôlhang, yhangmoq gi, Yhang lé a lumjínq shi kó nghut ri.

<sup>38</sup> Haú gi,

"Yhumsîng ê, nga-nhûng é danglù lé, ó yuq wá lumjínq byî wú é lhú? Haú Yhumsîng é loq‡ gi, ó yuq lé htoq shit wú é lhú?"<sup>✧</sup>  
ga, myiqhtoi Esai-aq taî tô é dang lo dik é nghut ri.

<sup>39</sup> Yhangmoq a wó lumjínq kô é hkyô gi, Esai-aq taî é dang má,

<sup>40</sup> "Yhang gi, yhangmoq é myoqjí lé lhoq chit byi lui, yhangmoq é i-myt lé lhoq htan to byi bê nghut ri;

haú mù, yhangmoq gi, myoqjí èq a wó myâng, i-myt èq a wó sê gyo, Ngò, yhangmoq lé yâ ge byi râ matú, a wó lhing taú lò kó dut râ nghut lhê."<sup>✧</sup>

ga le bo tô é yanmai nghut lhê.

<sup>41</sup> Esai-aq gi, Yesuq é hpungwup shingkang lé myang é yanmai, Yhang eq sêng é hkyô lé, haú su ga taî é nghut ri.

<sup>42</sup> Nghut kôlhang, haú uphkâng bang myo myo lháng gi, haú u má, Yesuq lé lumjínq bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui râ lé, gyuq kô é yanmai, yhangmoq lumjínq bê hkyô lé a yín yu bùm kó nghut ri.

<sup>43</sup> Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pé

---

‡ 12:38 Yhumsîng é loq gâ é gi, Yhumsîng é hpungwup a-tsam lé gâ é nghut lhê. ✧ 12:38 Esai 53:1 ✧ 12:40 Esai 6:10

chyang mâ é aróng lé, je ô naù kô é yanmai nghut ri.

<sup>44</sup> Haù mù, Yesuq, htê mó èq taì é gi, "Ngo lé lumjínng é sù gi, Ngo lé baú lumjínng é a nghut; haù Ngo lé nhang kat é Sù lé le, lumjínng é nghut lhê.

<sup>45</sup> Ngo lé myang é sù gi, haù Ngo lé nhang kat é Sù lé le myang é nghut lhê.

<sup>46</sup> Ngò gi, Ngo lé lumjínng é sù ó yuq le, mauchut hkaù má a nyì sháng gaq nghù, maubó đông mingkan má lé jé é nghut lhê.

<sup>47</sup> Ngò gi, Ngá é dang lé wó gyo luì, a châng é sù ó yuq lé le, jéyang râ a nghut; hkâsu mù gâ le, Ngò gi, mingkan lé jéyang râ matú jé lé é a nghut; haù mingkan lé hkyì yù râ matú sheq, jé lé é ru nghut lhê.

<sup>48</sup> Ngo lé he-ngik luì Ngá é dang lé a hap yu é sù lé, jéyang râ Sù rayuq nyì lhê; Ngò taì é danghkun haù gi, haù jìhtùm buinyì má, haù yuq lé mara byì râ nghut lhê.

<sup>49</sup> Hkâsu mù gâ le, Ngò gi, Ngá é myit đông taì é a nghut; nghut kôlhang, Ngò haì taì râ eq hkâsu nghù taì râ lé gi, haù Ngo lé nhang kat é sù Íwa mai, Ngo lé hkunmó hkyô to bê nghut lhê.

<sup>50</sup> Haù Yhâng é hkunmó gi, ahtum abyuq é asak nghut é lé, Ngò sê lhê. Haù mù luì, Ngò, haì taì kôlé, haù Íwa mai Ngo lé taì kyô é lé za, taì é nghut lhê." gâ ri.

## 13

### *Chángzô Pé É Hkyì Chi Byì É Hkyô*

<sup>1</sup> Haù Lhoqlhai Poì jé râ hí má za, Yesuq gi, Yhang, mingkan shì mai Yhâng Wâ chyang htot ló



râ ahkýing jé bê hkyô lé, sê ri. Yhang gi, mingkan má nyi é, Yhâng é byu pé lé chyttdap nyi é nghut luî, jihtûm jé shoq Yhâng é chyttdap myit lé shít râ nghut lhê.

<sup>2</sup> Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byi to gû nghut ri.

<sup>3</sup> Yesuq gi, haû lhunglháng lé Îwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luî, Garai Gasâng chyáng dum taû ló râ sù nghut é lé le, sê ri.

<sup>4</sup> Haû mù, Yhang gi, zohpoq mai toq luî, Yhâng é bumó lé hkyut pyám mù, hpyidum má hpajet ralhûm eq hpyihit hit tô ri.

<sup>5</sup> Hau htâng, Yhang gi, jirung má uchyam hut kat mù, Yhâng é chángzô pé é hkyi chi byi luî, haû Yhâng é hpyidum má hit tô é hpajet eq sut huí byi ri.

<sup>6</sup> Yhang gi, Simun Petruq chyáng jé jáng, Simun Petruq gi, "Yhumsîng ê, Nàng gi, ngá hkyi lé chi byi râ nghut lhê lhú?" ga myi ri.

<sup>7</sup> Haú hkûn, Yesuq gi, "Ngò, haî kut nyi é hkyô lé, ahkuî, nàng sê gyo râ a nghut; nghut kôhang, htâng má sê gyo râ nghut lhê." ga tû tâ ri.

<sup>8</sup> Petruq gi, "Ngá hkyi lé, Nàng, hkâ-nhám le wó chi byi râ a nghut." ga tá jáng, Yesuq gi, "Nang lé, Ngò a chi byi é nghut jáng, nàng gi, Ngò eq séng râ a nghut." ga tû tâ ri.

<sup>9</sup> Haú hkûn, Simun Petruq gi, "Yhumsîng ê, haû su nghut jáng gi, ngá é hkyi lé baú za a nghut, ngá é loq eq ulhum lé le chi byi laq!" ga tû tâ ri.

<sup>10</sup> Yesuq gi, "Gùng chi bê sũ gi, hkyĩ za chi jáng, ragùngdũ é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tũ taĩ ri.

<sup>11</sup> Hkâsu mù gâ le, Yhang gi, Yhang lé ap pyám rã sũ ó yuq nghut é lé, sê é yanmai, "Nungmoq gi, sanséng é bang chyat a nghut." ga taĩ é nghut ri.

<sup>12</sup> Yesuq gi, yhangmoq é hkyĩ lé ban chi byi jáng, Yhâng é bumó lé wut mù, Yhâng é jowò má ló dum zùng luĩ, yhangmoq lé myi é gi, "Nungmoq gi, ahkuĩ, ngò kut byĩ é hkyô lé, sê gyo akô lúh?"

<sup>13</sup> Nungmoq, Ngo lé, 'Sarã' ga le, 'Yhumsĩng' ga le, wut kô é gi, a shut; hkâsu mù gâ le, Ngò gi, háu yuq yhang nghut lhê.

<sup>14</sup> Ngò, nungmoq é Sarã eq Yhumsĩng nghut sũ lhang, nungmoq é hkyĩ lé chi byĩ é nghut le gi, nungmoq le, rayuq eq rayuq é hkyĩ lé chi byĩ lhum rã dut lhê.

<sup>15</sup> Nungmoq gi, Ngò, nungmoq lé kut byĩ é su kut kó sháng gaq nghũ, Ngò, nungmoq lé alik kut shit tô é nghut lhê.

<sup>16</sup> Ngò, nungmoq lé teng za taĩ kôlé, dui-nhâng zoshâng gi, yhumsĩng htoq je kô é a nghut; lagyo gi, nhang kat é sũ htoq je kô é a nghut.

<sup>17</sup> Ahkuĩ, nungmoq gi, háu pé lé sé bekô nghut luĩ, châng kut kô é nghut jáng, hkungsô wó kó rã nghut lhê.

### *Yesuq Lé Ap Pyám Rã Lé, Te Tai É Hkyô*

<sup>18</sup> Ngò gi, nungmoq banshoq bang lé lhoq ang luĩ taĩ é a nghut; Ngò hkyin yu é bang lé gi, Ngò sê lhê. Nghut kôlhang, 'Hãu ngã é muk lé bo zô é sũ gi, ngo lé, yhâng é hkyihtáng la-nhik èq nãng htíng

râ nghut lhê. <sup>19</sup> ✧ gâ é Chyúmdang lé, lhoq dik râ matú ru nghut lhê.

<sup>19</sup> Haû a dut htoq shimá, Ngò, nungmoq lé taí kyô nyi é gi, haû dut é hkûn, Ngò gi, haú Yuq\* nghut é lé, nungmoq wó lumjǐng kó râ matú nghut lhê.

<sup>20</sup> Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haû Ngo lé nhang kat é Sù lé hap yu é nghut bê." gâ ri.

<sup>21</sup> Yesuq gi, haû su ga taí é htâng má, myit wuîhke nyi mù, saksé hkâm é gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." gâ ri.

<sup>22</sup> Haû mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhûm bum akô nghut ri.

<sup>23</sup> Haû Yesuq chyitdap é chángzo rayuq gi, Yesuq é tanghkoí nâm má leq nge zung tô ri.

<sup>24</sup> Haû mù, Simun Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

<sup>25</sup> Haû mù, chángzo haû gi, Yesuq é tanghkoí má saí leq nge zung mù, "Yhumsîng ê, haû gi, ó yuq nghut lhê lhú?" ga, Yhang lé myí ri.

<sup>26</sup> Yesuq gi, "Ngò, muk jap zo shí lé jum yù mù, byí é sù gi, haú yuq nghut lhê." ga tû taí luí, muk jap zo haú lé jum yù mù, Simun é yhangzo Yudaq Iskarut lé byí ri.

---

✧ **13:18** Hkya-on 41:9      \* **13:19** Haú Yuq gâ é gi, Hkrisduq lé gâ é nghut lhê.

27 Yudaq gi, muk haû lé yù zo kat é eq, Tsadán gi, yhang chyáng wàng bê nghut ri.

Haû mù, Yesuq gi, "Nàng kut râ é hkyô lé, hân kut aq hkoi." ga yhang lé taí kat ri.

28 Nghut kôlhang, yhang lé, Yesuq haû su ga haí mù taí é hkyô lé, zohpoq haú má nyi tô é bang gi, rayuq lhang a sê gyo kó nghut ri.

29 Haû Yudaq gi, ngùn zum sù nghut é yanmai, ra-am gi, haû Poí má râ é hkyô lé, é wuî râ matú, Yesuq taí ri ga luí le, myùng bang lé rajung jung byí nhang ri ga luí le, myít yu bum akô nghut ri.

30 Yudaq gi, muk haû lé lhom yù eq, htoq ló byuq bê nghut ri. Haû u gi, mauchut bê nghut ri.

*Petruq He-ngik Pyám Râ Lé, Yesuq Te Taí É Hkyô  
Mht 26:31-35; Mrk 14:27-31; Luk 22:31-34*

31 Haú yuq htoq ló byuq jáng, Yesuq taí é gi, "Ahkuí, haû Byu Yhangzo gi, hpungwup shingkang dan hú é nghut luí, Garai Gasang gi, haû Byu Yhangzô é yanmai, hpungwup shingkang dan hu bê nghut ri.

32 Garai Gasang gi, haû Byu Yhangzô é yanmai, hpungwup shingkang dan hú é nghut jáng, Yhang le, Yhang má haû Zo lé hpungwup shingkang dan hu nhâng râ nghut lhê; radá dâm dan hu nhâng râ nghut lhê.

33 Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lhê; nghut kôlhang, 'Ngò ló é jang má, nungmoq wó jé kó râ a nghut.' nghû, haû Yudaq byu pé lé, Ngò taí é eq rajung za, ahkuí, nungmoq lé le, Ngò taí lhê.

34 Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum râ dut lhê.

35 Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunghâng bang sé kó râ nghut lhê." gâ ri.

36 Haú hkûn, Simun Petruq gi, "Yhumsîng ê, Nàng, hká shut ló râ lhú?" ga, Yhang lé myi jáng, Yhang gi, "Ngò ló é jang má, nungmoq, ahkuî a wó châng kó râ nghut lhê. Nghut kôhang, htâng má gi, nungmoq châng ra kó râ nghut lhê." ga tû taí ri.

37 Petruq gi, "Yhumsîng ê, haí mù luî, ahkuî ngò Náng htâng a wó châng é lhú? Ngò gi, Náng é matú, shî hkám râ rì rì nghut lhê." ga taí ri.

38 Haú mù, Yesuq taí é gi, "Nàng gi, gè gè yhang, Ngá é matú shî hkám râ lhú? Ngò, nàng lé teng za taí lé, woq a tûn shimá, nàng, Ngo lé sum dâm hengik pyám râ nghut lhê.

## 14

### *Yesuq, Yhâng É Chángzô Pé Lé Nhik Tîng É Hkyô*

1 Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq.

2 Ngá Wâ é yhûm má, nyì jowò myo myo joq lhê; a joq é ru nghut le gi, noq mai, Ngò, nungmoq lé taí kyo râ nghut lhê. Ngò, haú má ló é gi, nungmoq é nyì jowò ló hên lánng râ matú ru nghut lhê.

3 Ngò gi, ló mù, nungmoq é matú nyì jowò ló hen é nghut jáng, Ngò nyi é jang má nungmoq le wó nyi

shoq, Ngò eq rahá nyì râ matú, Ngò dum taû lé mù, nungmoq lé, lé shuí yù râ nghut lhê.

<sup>4</sup> Ngò ló é jang má jé é hkyô lé, nungmoq sê lhê." gâ ri.

### *Yesuq Za Hkyô*

<sup>5</sup> Haú hkûn, Htomaq gi, Yhang lé, "Yhumsîng ê, Nàng hká shut ló é lé lhang, ngamoq a sê le nhîng, hkyô haú lé, ngamoq hkâsu kut wó sé râ lú?" ga myî ri.

<sup>6</sup> Yesuq gi, "Ngò gi, hkyô nghut lhê; haú tengmán hkyô eq asak le nghut lhê. Ngò mai za a nghut jang, ó yuq le, Íwâ chyáng wó jé é a nghut.

<sup>7</sup> Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó râ nghut lhê. Ahkuî mai, nungmoq gi, Yhang lé sé kô é htoq agó, myàng le myang wú bekô nghut lhê." ga tâ ri.

<sup>8</sup> Haú hkûn, Hpilip gi, "Yhumsîng ê, ngamoq lé, haú Íwa tân shit laq, haú hkûn, ngamoq nhik shî râ nghut lhê." ga tâ ri.

<sup>9</sup> Yesuq tú tâ é gi, "Hpilip ê, Ngò, nungmoq eq shî myáng lhang nyi lò bê le nhîng, nàng, Ngo lé a sé lú? Ngo lé myang é sù gi, haú Íwa lé myàng bê nghut ri; haú nghut le nhîng, 'Ngamoq lé, haú Íwa tân shit laq.' nghû, nàng hkâsu wó tâi lhê lú?"

<sup>10</sup> Ngò gi, haú Íwa má nghut nyî luî, haú Íwa gi, Ngò má nghut nyi é hkyô lé, nàng a lumjîng lú? Ngò, nungmoq lé tâi é dang haú pé gi, Ngá é myit mai tâi é a nghut; haú Ngò má lúng nyi é Íwa sheq, Yhâng é mú zú nyi é ru nghut lhê.

<sup>11</sup> Ngò gi, haú Íwa má nghut nyî luî, haú Íwa gi, Ngò má nghut nyi lhê nghû é lé lumjîng keq; haú

a nghut jáng, kut shit é limik kumlhá pé dông za lháng, lumjǐng keq.

<sup>12</sup> Ngò, nungmoq lé teng za tái kôlé, Ngo lé lumjǐng é sũ gi, Ngò kut é muzó lé kut râ nghut lhê. Ngò gi, haũ Íwâ chyáng ló râ nghut é yanmai, haũ yuq gi, hau htoq je kô é muzó pé lé lháng kut râ nghut lhê.

<sup>13</sup> Haũ Yhangzô é yanmai, Íwâ é hpungwup shingkan wó hũ ló shoq, Ngá é myìng lé lang luĩ, nungmoq haĩ jung dung kôlhang, Ngò gyo byi râ nghut lhê.

<sup>14</sup> Nungmoq gi, Ngá é myìng lé lang luĩ, haĩ dung kôlhang, Ngò gyo byi râ nghut lhê.

### *Chyoiyung Woi-nyí Byi Râ Danggidiq*

<sup>15</sup> Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó râ nghut lhê.

<sup>16</sup> Haũ Íwa gi, nungmoq eq ahtum abyuq nyi nyi râ nghut é, hpaqchyí byi Sũ gotũ rayuq, nungmoq lé byi râ matú, Ngò gi, haũ Íwa lé dung râ nghut lhê.

<sup>17</sup> Haũ yuq gi, tengmán é Woi-nyí nghut lhê. Haũ mingkan gi, Woi-nyí haũ lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut luĩ, nungmoq má nyi to râ Sũ nghut é yanmai, nungmoq gi, Yhang lé sê akô.

<sup>18</sup> Ngò gi, nungmoq lé, chuizô pé dông pyâm to râ a nghut; nungmoq chyáng Ngò dum jé lé râ nghut lhê.

<sup>19</sup> Adê myáng má, haũ mingkan gi, Ngo lé a myàng lo râ nghut lhê; nghut kôlhang, nungmoq gi, Ngo lé myàng kó râ nghut lhê. Hkâsu mù gâ le, Ngò

gi, asak dui nyi é nghut mù, nungmoq le duì kó rã nghut lhê.

<sup>20</sup> Ngò gi, Ngá Wã chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haú buinyì má, nungmoq sé kó rã nghut lhê.

<sup>21</sup> Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap rã nghut lhê; Ngò le, haú yuq lé chyitdap luì, Ngá gûng lé yhang, yhang lé shit rã nghut lhê." gâ ri.

<sup>22</sup> Hau htâng, (Yudaq Iskarut a nghut sù) Yudaq gi, "Yhumsîng ê, Nàng gi, haú mingkan lé Náng gûng a shit e za, ngamoq lé shit rã nghut é gi, haì mù nghut lhê lhu?" ga myî ri.

<sup>23</sup> Haú hkûn, Yesuq tû tái gi, "Rayuq yuq, Ngo lé chyitdap é nghut le gi, Ngá dang lé gyo rã nghut lhê. Ngá Wa le, haú yuq lé chyitdap rã nghut luì, Ngá hpe gi, haú yuq chyáng lé mù, yhang eq rahá nyi rã nghut lhê.

<sup>24</sup> Ngo lé a chyitdap é sù gi, Ngá dang lé gyo rã a nghut. Nàng wó gyô é dang shí pé gi, Ngá myit mai tái é a nghut; dang haú pé gi, Ngo lé nhang kat é Sù, haú Íwã é ru nghut lhê.

<sup>25</sup> Ngò gi, shî pé banshoq lé, nungmoq eq rahá nyi tô ashî u lé tái bê nghut lhê.

<sup>26</sup> Nghut kôlhang, Ngá é myìng dông, haú Íwa nhang kat rã nghut é, hpaqchyî byi Sù nghû é, haú Chyoiyúng Woi-nyí gi, nungmoq lé, jung hkgangmó mhoq byi rã eq, Ngò, nungmoq lé tái kyo bê hkyô lhunglhang, nungmoq lé lhoq pun rã nghut lhê.



<sup>27</sup> Ngò gi, nungmoq chyáng, nguingón hkyô tô to byi bê; Ngá é nguingón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myt nhiklhum lé, myit wui myit hke é eq gyuq kyûm é hkâdut nhâng kó.

<sup>28</sup> Ngò gi, ló byuq luî, nungmoq chyáng dum taû lé râ nghut lhê.' nghû, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haû Îwâ chyáng Ngò ló râ nghut é hkyô lé, nungmoq gabú kó râ nghut lhê; hkâsu mù gâ le, haû Îwa gi, Ngá htoq je ko Sû nghut lhê.

<sup>29</sup> Haû dut é hkûn, nungmoq lumjîng kó sháng gaq nghû, ahkuî, haû a dut shimá, Ngò, nungmoq lé taí kyô é nghut lhê.

<sup>30</sup> Ahkuî mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyi bê nghut ri. Haú yuq gi, Ngo lé up râ ahkáng haí a wó é sù nghut ri.

<sup>31</sup> Nghut kôlhang, haû Îwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

## 15

### *Tsibiyiq Nuî Eq Akoq Pê É Hkyô*

<sup>1</sup> Ngò gi, haû tsibiyiq nuî akyîng nghut lhê; Ngá Wa gi, tsibiyiq hkyâm yhumsîng nghut lhê.

<sup>2</sup> Yhang gi, ashí a zuî é akoq hkanqmó lé, Ngá chyáng mai kyik pyám luî, ashí zuî é akoq hkanqmó lé kúm gi, ashí je myo zui sháng gaq ga, shang pyám byí ri.

<sup>3</sup> Nungmoq gi, Ngò, nungmoq lé taí é mungdang hau é yanmai, sanséng gû nghut bekô nghut ri.

<sup>4</sup> Ngò má nyi nyi keq; Ngò le, nungmoq má nyi nyi râ nghut lhê. Akoq hkanmó gi, tsibiyiq nuí má nui nyi é za a nghut jáng, yhang baú ashí wó zuí é a nghut. Haú eq rajung za, nungmoq le, Ngò má nyi nyi e za a nghut jang, ashí wó zui kó râ a nghut.

<sup>5</sup> Ngò gi, tsibiyiq nuí nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haú yuq gi, ashí myo myo zui râ nghut lhê; hkâsu mù gâ le, Ngò mai gang jáng, nungmoq gi, haí le a wó kut kô é nghut lhê.

<sup>6</sup> Ngò má a nyi nyi é sù gi, haú dú pyâm é hui luí, kyuq shi byuq é akoq eq wuí ri; haú sù é akoq pé gi, byu pé èq guq yù mù, myihkyóm má dú kat pyâm é hui luí, nyé gyó byuq râ nghut lhê.

<sup>7</sup> Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau é haí nghut kôlháng, dung keq; haú hkûn, nungmoq lé byi râ nghut lhê.

<sup>8</sup> Nungmoq gi, haú ashí ga-myhó zuí é dông, Ngá Wâ é hpungwup shingkang lé lhoq htoq shit é nghut luí, Ngá é chángzô pé nghut é hkyô lé tûn shit nyí bekô nghut ri.

<sup>9</sup> Haú Îwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má gîng nyi keq.

<sup>10</sup> Ngò gi, Ngá Wâ é hkunmó lé châng é nghut luí, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ

nghut lhê.

<sup>11</sup> Nungmoq má Ngá é gabú hkyô joq nyi râ eq, nungmoq é gabú hkyô wó byíng Jup râ matú, Ngò, nungmoq lé, dang shí pé taí é nghut lhê.

<sup>12</sup> Ngò, nungmoq lé chyitdap é su, nungmoq yhangchang chyitdap lhum keq; haû gi, Ngá é hkunmó nghut lhê.

<sup>13</sup> Haû yhumsing é luzúm wui é matú, yhumsing é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri.

<sup>14</sup> Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wui nghut bekô.

<sup>15</sup> Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wui nghû wut é nghut lhê; hkâsu mù gâ le, dui-nhâng zoshâng gi, yhâng yhumsing hpô é muzó lé a châng sé nghut ri.

<sup>16</sup> Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gíng nyi é ashi zui râ matú hkyin masat tô é ru nghut lhê. Hau hkûn sheq, Ngá é myìng lé lang mù, haû Îwâ chyáng nungmoq haí jung dung kôle, Yhang byi râ nghut lhê.

<sup>17</sup> Nungmoq yhangchang chyitdap lhum keq; haû gi, Ngá é hkunmó nghut lhê.

*Haû Mingkan Gi, Chángzô Pé Lé A Jú É Hkyô*

<sup>18</sup> Haû mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq.

<sup>19</sup> Nungmoq gi, haû mingkan eq sêng é bang nghut é nghut jáng, haû mingkan gi, yhang eq

sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luí, nungmoq gi, haû mingkan eq a séng lo kô é yanmai, mingkan gi, nungmoq lé a jú é nghut ri.

<sup>20</sup> 'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bûn nyi keq. Ngo lé lhang, yhangmoq zing-rî yû bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó râ nghut lhê.

<sup>21</sup> Nghut kôlhang, yhangmoq gi, Ngá é mying é yanmai, nungmoq lé haû su kut kó râ nghut lhê; hkâsu mù gâ le, haû Ngo lé nhang kat é Sû lé, yhangmoq a sé kôluí nghut ri.

<sup>22</sup> Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuí gi, yhangmoq mara wó taí hkyut râ a nghut lo.

<sup>23</sup> Ngo lé a jú é sù gi, Ngá Wa lé le a jú é sù nghut ri.

<sup>24</sup> Haû ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuí kúm gi, laklai kumlhá haû pé lé yhangmoq myang nyi kôlhang, Ngò eq Ngá Wa lé a jú kô é nghut ri.

<sup>25</sup> Haû gi, 'Yhangmoq gi, jumgúyô má Ngo lé a jú kut akô nghut ri.'<sup>☆</sup> ga, yhangmoq é tarâ má kê tô é dang lé lhoq dik é nghut ri.

<sup>26</sup> Haû Íwâ chyáng mâ é, Ngò nhang kat râ nghut

<sup>☆</sup> 15:25 Hkya-on 35:19; 69:4

é, Íwa mai htoq lé lo é tengmán é Woi-nyí nghut é, haú hpaqchyî byi Sû jé lé é hkûn, Ngá é hkyô lé saksé hkám byi râ nghut lhê.

<sup>27</sup> Nungmoq le, Ngò eq rahá sâng-hi mai nyî bekô nghut é yanmai, saksé hkám byi ra kó râ nghut lhê.

## 16

<sup>1</sup> Nungmoq gi, myit lingbat jowò a joq kó sháng gaq nghû, haú pé banshoq lé, Ngò, nungmoq lé taí kyo bê nghut lhê.

<sup>2</sup> Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haú dông mai Garai Gasang lé dojaú nyi lhê ga myit yu é ahkyíng, gè gè yhang, jé râ nghut lhê.

<sup>3</sup> Yhangmoq gi, haú Íwa lé le, Ngo lé le, a sé kô é yanmai, haú su kut kó râ nghut lhê.

<sup>4</sup> Nghut kôlhang, nungmoq lé, Ngò sidiq byî é hkyô lé, ahkyíng jé jáng nungmoq bûn nyî kó sháng gaq nghû, Ngò haú hkyô taí kyô é nghut lhê. Ngò gi, nungmoq eq rahá nghut nyî é yanmai, haú hkyô lé, hí hkûn nungmoq lé a taí kyô é nghut lhê.

### *Chyoiyúng Woi-nyí é muzó*

<sup>5</sup> Nghut kôlhang, ahkuî, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lúh?' ga, Ngo lé a myi kó nghut ri.

<sup>6</sup> Ngò, nungmoq lé, haú hkyô pé taí kyô é yanmai, nungmoq é i-myt unghkaú má iyon hkyô byíng to bekô nghut ri.

<sup>7</sup> Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ

hkyô ru nghut lê. Ngò ló byuq e za a nghut jáng, haû hpaqchyî byi Sû gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lê.

<sup>8</sup> Yhang jé lé é hkûn, Yhang gi, haû mara wó é eq séng luí le, dingmán hkyô eq séng luí le, tarâ jéyáng hkyô eq séng luí le, haû mingkan lé tân shit râ nghut lê.

<sup>9</sup> Haû yubak mara wó é eq séng luí ga jang, byu pé gi, Ngo lé a lumjúng kô é yanmai nghut ri.

<sup>10</sup> Haû dingmán hkyô eq séng luí ga jang, Ngò gi, haû Îwâ chyáng ló râ nghut luí, nungmoq, Ngo lé a myàng lo kó râ nghut é yanmai nghut ri.

<sup>11</sup> Haû tarâ jéyáng hkyô eq séng luí ga jang, mingkan shi é zau gi, mara byî é huí é nghut é yanmai nghut ri.

<sup>12</sup> Ngò gi, nungmoq lé taí râ hkyô myo myo wó ashî; nghut kôlhang, ahkuî, nungmoq wó hkâm kó râ a nghut.

<sup>13</sup> Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé râ nghut lê. Yhang gi, Yhâng myit đông taí râ a nghut; Yhang, wó gyô yu é hkyô lé za taí luí, dut lò râ hkyô pé lé le, nungmoq chyáng taí pyô râ nghut lê.

<sup>14</sup> Yhang gi, Ngò wó é lé, yù mù, nungmoq lé taí kyô é eq sé nhang é đông, Ngá é hpungwup shing kang lè hù ló nhâng râ nghut lê.

<sup>15</sup> Haû Îwa wó é lhunglhang gi, Ngá é chyat nghut lê. Hau é yanmai, haû Woi-nyí gi, Ngò wó é lé yù mù, nungmoq lé sé nhâng râ nghut lê nghû, Ngò taí é nghut lê.

16 Adê myáng má, nungmoq gi, Ngo lé a myàng lo kó râ nghut lê; hau htâng, dum adê myáng má, nungmoq gi, Ngo lé myàng kó râ nghut lê." gâ ri.

*Changzô Pé É Iyon Hkyô Gi, Gabú Hkyô Taú Dut Râ*

17 Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó râ nghut lê; hau htâng, dum adê myáng má, nungmoq gi, Ngo lé myàng kó râ nghut lê.' gâ é eq 'Ngò gi, Íwâ chyáng ló râ nghut é yanmai nghut lê.' ga, Yhang taí é gi, haí jung gá nau é nghut lê lú?" ga, rayuq eq rayuq myí lhum bum akô.

18 Hau htoq agó, yhangmoq gi, "Adê myáng má, ' gâ é gi, Yhang haí jung gá nau lê lú? Nga-nhúng gi, Yhang haí taí nau é lé a sê gyo." ga, taí lhum bum akô nghut ri.

19 Yesuq gi, yhangmoq myi naú kô é hkyô lé sê ri; haú mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó râ nghut lê; hau htâng, dum adê myáng má, nungmoq gi, Ngo lé myàng kó râ nghut lê.' nghû, Ngò taí é lé, haí jung gá nau lê laq nghû, rayuq eq rayuq myi lhum nyi akô lú?"

20 Ngò, nungmoq lé teng za taí kôlé, haú mingkan gi, gabú nyi é u lé, nungmoq gi, ngaú é eq iyon yón é hui kó râ nghut lê. Nungmoq gi, iyon yón é hui kó râ nghut lê; nghut kôlhang, nungmoq é iyon hkyô gi, gabú hkyô taú dut râ nghut lê.

21 Myiwe gi, zoshâng hkû râ nghut jáng, zohkû-nò nò râ ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku

to bê nghut luî, yhang gabú é yanmai, haû no hpu é hkyô lé a bun byuq lo nghut ri.

<sup>22</sup> Haû eq rajung za, ahkuî gi, nungmoq iyon yôn é ahkyíng nghut ri; nghut kôlhang, Ngò, nungmoq lé dum huî é hkûn, nungmoq gi, gabú kó râ nghut lhê; nungmoq é gabú hkyô haû lé, nungmoq chyáng mai ó yuq èq le wó yu pyám byi râ a nghut.

<sup>23</sup> Haú buinyì má, nungmoq gi, Ngo lé, haî le a dung lo kó râ nghut lhê. Ngò, nungmoq lé teng za taí kôlé, nungmoq gi, Ngá myíng lang luî, Ngá Wâ chyáng haî dung kôle, Yhang byi râ nghut lhê.

<sup>24</sup> Ahkuî jé shoq, nungmoq gi, Ngá myíng lé lang luî, haî le a dúng wú shi kó nghut ri. Dung keq, haú hkûn, nungmoq myang hap yù kó râ nghut luî, nungmoq é gabú hkyô gi, byíng jup lò râ nghut lhê.

<sup>25</sup> Ngò gi, nungmoq lé, dangtú dông haú pé taí kyo bê nghut lhê; nghut kôlhang, Ngò gi, dangtú a chùng lô e za, haû Íwa eq sêng é hkyô, nungmoq lé san za taí kyô é ahkyíng jé râ nghut lhê.

<sup>26</sup> Haú buinyì má, nungmoq gi, Ngá é myíng lé lang luî dung kó râ nghut lhê. Ngò gi, nungmoq é matú, haû Íwâ chyáng dung byi râ nghut taí nyi é a nghut.

<sup>27</sup> Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haû Íwa yhang, nungmoq lé chyitdap é nghut lhê.

<sup>28</sup> Ngò gi, haû Íwâ chyáng mai htoq lé mù, mingkan má lé jé wang é nghut lhê; ahkuî, Ngò gi, mingkan mai htoq mù, haû Íwâ chyáng dum taû ló râ nghut lhê." gâ ri.



29 Haú hkûn, Yesuq é chángzô pé gi, "Ahkuî, Nàng gi, dangtú a chûng é dông, san za taí kyô nyi é nghut bê!

30 Nàng gi, lhunglhang lé sê é sù nghut é lé le, Nàng lé, ó yuq eq le dangmyi myi nó a râ é hkyô lé le, ahkuî, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjínghê." ga taí bum akô.

31 Haú hkûn, Yesuq tû taí é gi, "Nungmoq, ahkuî lumjínghê bekô l hú?

32 Nghut kôlhang, nungmoq gi, lhoq pyo pyâm é hui luî, Ngo lé baú za tô pyâm to kômù, ó le ô yhâm shut ló byuq râ ahkyínghê jé lo nyi bê nghut ri; ahkuî lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lghê.

33 Nungmoq gi, Ngò má nuingónghê hkyô wó kó sháng gaq nghû, Ngò gi, haú hkyô pé lé taí kyô é nghut lghê. Nungmoq gi, mingkan shí má, wuîhke hkyô hui kó râ nghut lghê; nghut kôlhang, myit wum lhoq kínghê. Ngò gi, mingkan lé ung pyám bê nghut lghê." gâ ri.

## 17

### *Yesuq Kyûdûng É Hkyô*

1 Yesuq gi, haú su ga taí é htâng má, mauhkûng shut tu wú luî, kyûdûng é gi, "Áwa ê, ahkyínghê jé bê nghut ri; haú Nung Zo gi, Nang lé hpungwup shínghê wó hu nhâng sháng gaq, Nung Zo lé hpungwup shínghê hû ló nhâng laq ô!

2 Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó

byi sháng gaq ga, Nàng gi, byù lhunghâng bang lé up râ ahkáng, Yhang lé byî tô é yanmai nghut ri.

<sup>3</sup> Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê.

<sup>4</sup> Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê.

<sup>5</sup> Áwa ê, haû mingkan lháng a joq shî mai, Ngò, Nàng eq rahá chôm wó é hpungwup shingkang eq, ahkuí, Náng é myoq hí má, Ngo lé hpungwup shingkang dan hu nhâng laq.

*Chángzô pé matú, Yesuq kyûdung byî é hkyô*

<sup>6</sup> Mingkan mai, Nàng, Ngo lé hkyin htoq yû byî é bang lé, Ngò gi, Náng é myìng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekô nghut ri.

<sup>7</sup> Nàng, Ngo lé byî é lhungháng gi, Náng chyáng mâ é nghut é lé, ahkuí, yhangmoq sé bekô nghut ri.

<sup>8</sup> Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut luí, yhangmoq gi, haû pé lé hap yù bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nàng, Ngo lé nhang kat é hkyô lé le, yhangmoq lumjìng bekô nghut ri.

<sup>9</sup> Ngò gi, yhangmoq é matú kyûdung byî lhê. Ngò gi, haû mingkan byu pê é matú dung byi nyi é a nghut; Nàng, Ngo lé ap byi tô é bâng é matú

sheq dung byi nyi é ru nghut lhê; hkâsu mù gê le, yhangmoq gi, Náng é byu pé nghut akô.

10 Ngò wó é lhunglhang gi, Náng é chyat nghut mù, Nàng wó é lhunglhang le, Ngá é chyat nghut lhê. Haû mù, Ngò gi, yhangmoq má hpungwup shingkang hû é hui bê nghut lhê.

11 Ngò gi, Nàng chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haû Náng myìng é a-tsam eq yhangmoq lé upzúng nyi aq.

12 Ngò gi, yhangmoq eq rahá nghut nyi é u lé, yhangmoq lé upzúng bê nghut luî, Nàng, Ngo lé byi é myìng hau eq, yhangmoq lé rago zúng bê nghut lhê. Haû Chyúmdang lhoq dik sháng gaq ga, haû bang mâ é htên byoq hui râ sù mai lai luî, ó yuq le a byuq byuq é nghut lhê.

13 Ngò gi, ahkuî, Náng chyáng lò râ nghut bê; nghut kôlhang, Ngá é gabú hkyô gi, yhangmoq chyáng byíng jup sháng gaq nghû, Ngò gi, haû pé lé mingkan má tai é nghut lhê.

14 Ngò gi, yhangmoq lé, Náng é mungdang byi bê nghut lhê; haû mingkan gi, yhangmoq lé a jú nghut ri; hkâsu mù gê le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri.

15 Ngò kyûdûng é gi, Nàng, yhangmoq lé mingkan mai shuí htoq yû râ matú dúng é a nghut, haû agè ashop su chyáng mai, yhangmoq lé upzúng yû râ matú sheq dúng é ru nghut lhê.

16 Ngò gi, mingkan mâ é a nghut é su, yhangmoq le, mingkan mâ é a nghut kó.

17 Yhangmoq lé, haû tengmán hkyo èq lhoq sân-yúng yû laq; Nàng é mungdang gi, tengmán hkyô nghut ri.

18 Nàng, Ngo lé, mingkan má nhang hông kat é su, Ngò le, yhangmoq lé, mingkan má nhang hông kat é nghut lhê.

19 Yhangmoq lé, tengmán hkyô má wó lhoq sân-yúng yû kó sháng gaq nghû, Ngò gi, yhangmoq é matú, yhumsing gùng lé lhoq sân-yúng yu é nghut lhê.

*Lumjínq Bang Lhunglhâng É Matú, Yesuq Kyûdung Byî É Hkyô*

20 Ngò gi, yhangmoq é matú baú za kyûdung byî é a nghut; Yhangmoq é danglu é yanmai, Ngo lé lumjínq kó râ bâng é matú le, Ngò kyûdung byî é nghut lhê.

21 Haû mù, yhangmoq banshoq bang gi, rading ralhum za dut nyi kó sháng gaq. Haû mingkan gi, Nàng, Ngo lé nhang kat é hkyô lé wó lumjínq sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq.

22 Ngá hpe gi, ragùng za nghut é su, yhangmoq le, rading ralhum za dut nyi kó sháng gaq nghû, Ngò gi, Nàng, Ngo lé byî é hpungwup shingkanq lé, yhangmoq lé byi bê nghut lhê.

23 Nàng, Ngo lé nhang kat bê hkyô eq Nàng, Ngo lé chytđap é su, yhangmoq lé chytđap é hkyô lé, haû mingkan wó sé râ matú, yhangmoq gi, gumjup shoq rading ralhum za wó dut kó sháng

gaq nghû, Ngò gi, yhangmoq má nyi nyi luî, Nàng gi, Ngò má nyi nyi é nghut lhê.

<sup>24</sup> Âwa ê, haû mingkan lhang a joq shi mai, Nàng, Ngo lé chyitdap luî byi tô é hpungwup shingkan haû lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

<sup>25</sup> Dingmán é Âwa ê, haû mingkan gi, Nang lé a sé kôlhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akô nghut ri.

<sup>26</sup> Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luî, xoq mù sé nhang nyi shirâ nghut lhê." gâ ri.

## 18

### *Yesuq Chyup Yû Huî É Hkyô*

*Mht 26:47-56; Mrk 14:43-50; Luk 22:47-53*

<sup>1</sup> Yesuq gi, haû su ga kyûdûng é htâng má, Yhâng é chángzô pé eq rahá, Kedron wuîhkung mai lai byit dap ló luî, haû hpoq má joq é hkyâm ralhum má wang e akô nghut ri.

<sup>2</sup> Hkyâm haû gi, Yesuq eq Yhâng é chángzô pé lhaq hui hui kut é jowò nghut é yanmai, haû Yesuq lé ap pyám râ sù Yudaq le sê ri.

<sup>3</sup> Haû mù, Yudaq gi, haû hkyangjong agyi pé eq Hparishe pé chyáng mai nhang kat é noqkuq yhûm zúng bang ra-am eq gyezo rajùm lé, haû jowò shut shuî wang lé lo ri. Haû bang gi, myihu, myibung eq shâm lâm pé chung lé lo akô.

4 Yesuq gi, Yhang má dut lò râ hkyô lunglhang lé sé gû nghut mù, htoq ê luî, yhangmoq lé, "Nungmoq, ó yuq lé ho akô lú?" ga myî ri.

5 Haú hkûn, yhangmoq gi, "Nazaret wà byù Yesuq lé ho lhê." ga tû taí kôjáng, Yesuq gi, "Ngò gi, haú yuq nghut lhê." ga taí ri. (Yesuq lé ap pyám sù Yudaq le, yhangmoq eq rahá yap tô ri.)

6 "Ngò gi, haú yuq nghut lhê." ga Yesuq taí kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.

7 Yhang gi, "Nungmoq, ó yuq lé ho akô lú?" ga, yhangmoq lé dum myî kat jáng, yhangmoq gi, "Nazaret wà byù Yesuq lé ho lhê." ga taí akô.

8 Haú hkûn, Yesuq gi, "Ngò gi, haú yuq nghut lhê nghû, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tû taí ri.

9 Haú gi, "Nàng, Ngo lé byî tô é bang rayuq le lhang, Ngò, a lhoq hpyuq pyám." ga, Yhang taí tô é dang dik râ matú nghut ri.

10 Haú hkûn, Simun Petruq gi, shâm wun tô é nghut luî, shâm shê mù, haú hkyangjong mó é dui-nhâng zôshang é loqyo nohkyap lé zân hpyit kat byî ri. (Dui-nhâng zoshâng haú yuq é myìng gi, Malhku gâ ri.)

11 Haú mù, Yesuq gi, Petruq lé, "Náng é shâm lé, shambyâng má xâng pyám aq! Haú Îwa, Ngo lé byî é góm\* lé, Ngò a shuq é wó nyî râ lú?" ga taí kat ri.

*Yesuq Lé, Anna Chyang Shuî E É Hkyô  
Mht 26:57-58; Mrk 14:53-54; Luk 22:54*

\* **18:11** Góm lé shuq gâ é gi, jamjau hui râ eq shí hkám râ lé, taí nau é nghut lhê.

12 Hau htâng, gyezo haú jûm eq yhangmoq é gyezau hpó, Yudaq byu pê é mingsuwún wuî gi, Yesuq lé chyup yû mù, tuí akô nghut ri.

13 Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akô nghut ri.

14 Kayahpaq gi, byu pê é matú rayuq shî hkám byî le je gè râ nghut lhê ga, haú Yudaq byu pé lé hpaqchyî byî é sù yuq nghut ri.

*Yesuq Lé, Petruq Sâng-hi Dam He-ngik Pyâm É Hkyô*

*Mht 26:69-70; Mrk 14:66-68; Luk 22:55-57*

15 Simun Petruq eq gotû chángzo rayuq gi, Yesuq htâng châng e ló akô nghut ri. Gotû chángzo haú yuq gi, hkyangjong mó lé rago sê lhê nghut mù luî, hkyangjong mó é yhumwàng hkaû shut, Yesuq é htâng má châng wang ló ri.

16 Petruq kúm gi, hkúmdong shinggan má lánng yap tô ri. Haú hkyangjong mó lé rago sê é sù, gotû chángzo haú yuq gi, taú htoq ló mù, hkum zúng é myiwe myhí lé tái luî, Petruq lé shuí hâng yu ri.

17 Haú hkûn, haú hkum zúng é myiwe myhí gi, Petruq lé, "Nàng gi, haú yuq é chángzô pé mâ é rayuq a nghut lhú?" ga myi jáng, yhang gi, "Ngò a nghut." ga tû tái ri.

18 Haú u lé, gyoq é yanmai, dui-nhâng zoshâng wuî eq noqkuq yhûm zúng bang gi, yhangmoq gyoq gâng râ matú myigyê èq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

*Yesuq Lé, Hkyangjong Mó Myî Choq Wú É Hkyô  
Mht 26:59-66; Mrk 14:55-64; Luk 22:66-71*

<sup>19</sup> Haú u lé, haú hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luî myî ri.

<sup>20</sup> Haú hkûn, Yesuq gi, "Haú mingkan htoq má, Ngò, de de taí bê nghut lhê. Ngò gi, haú Yudaq byu pé banshoq bang chôm zîng é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luî taí é hkyô haî le a joq.

<sup>21</sup> Nàng, haî mù Ngo lé myi lhê lhú? Haú, Ngò taí é lé wó gyô é bang lé myi aq; Ngò haî taí é hkyô lé, yhangmoq gè gè sê akô nghut ri." ga tû taí ri.

<sup>22</sup> Yesuq haú su ga taí jáng, haú nàm má nyi tô é noqkuq yhûm zúng sû rayuq gi, Yhang lé pyuq kat luî, "Hkyangjong mó lé wá, Nàng, haú su nghû dang tû lhê lhú?" ga taí ri.

<sup>23</sup> Haú hkûn, Yesuq gi, "Ngò taí shut é nghut le gi, shut é hkyô lé saksé tûn shit aq. Nghut kôlhâng, Ngò gi, têng é dông ru taí le nhîng, nàng, haî mù Ngo lé pyuq lhê lhú?" ga tû taí ri.

<sup>24</sup> Hau htâng, Anna gi, Yhang lé tuî to gù, haú hkyangjong mó Kayahpaq chyáng dé kat nhang ri.

*Yesuq Lé, Petruq Xoq He-ngik Pyâm É Hkyô  
Mht 26:71-75; Mrk 14:69-72; Luk 22:58-62*

<sup>25</sup> Haú Simun Petruq gyoq gang yap tô é hkûn, "Nàng gi, Yhâng é chángzô pé mâ é rayuq a nghut lhú?" ga, yhang lé myî kôjáng, yhang gi, "Ngò a nghut." ga, dum he pyâm ri.

<sup>26</sup> Haú Petruq eq nohkyap zân hpyit pyám byî é huí su é buinùm nghut é sû, haú hkyangjong mó é dui-nhâng zoshâng rayuq gi, yhang lé, "Haú



hkyâm má, nàng, Yhang eq rahá nghut nyi é lé, ngò a myang é su ngam lê lú?" ga taí ri.

<sup>27</sup> Haú hkûn, Petruq gi, xoq he pyám ri; haú u yhang, woq tân bê nghut ri.

*Pilat É Myoq Hí Má, Yesuq Jé Nyi É Hkun Lê Hkyô*

*Mht 27:1-2, 11-14; Mrk 15:1-5; Luk 23:1-5*

<sup>28</sup> Hau htâng, yhangmoq gi, Yesuq lé, Kayahpaq chyáng mai, haú mauzau hpô é yhûmwàng shut shuí e ló akô. Haú u gi, napsûn noq ashî nghut ri. Yhangmoq gi, agot a-û a dut e za, htûngli đông Lhoqlhai Poí lé wó zo râ matú, yhúmkaú má a wàng kó nghut ri.

<sup>29</sup> Haú mù luí, mauzau Pilat gi, yhangmoq chyáng htoq é mù, "Shí yuq lé, nungmoq hai mara hûn nau akô lú?" ga myí ri.

<sup>30</sup> Haú hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi râ a nghut." ga tú taí akô.

<sup>31</sup> Pilat gi, "Yhang lé, nungmoq yhang shuí ló mù, nungmoq é tarâ đông ló jéyáng keq." ga taí jáng, haú Yudaq byu pé gi, "Nghut kôlhang, ngamoq gi, ó yuq lé sat râ ahkáng le a wó é nghut lê." ga tú taí akô nghut ri.

<sup>32</sup> Haú su dut é hkyô gi, Yesuq, Yhang hká đông shí râ ga taí é dang lé lhoq dik râ matú nghut lê.

<sup>33</sup> Haú mù, Pilat gi, yhúmkaú má taú wang ló mù, Yesuq lé wut yù luí, "Nàng gi, Yudaq byu pé é hkohkâm nghut lê lú?" ga myí ri.

<sup>34</sup> Haú hkûn, Yesuq gi, "Haú gi, náng é myit đông taí é nghut lê lú? A nghut jáng, góbang mai, nang

lé, Ngá é hkyô taí kyo luí nghut lhê lhú?" ga taú myí ri.

<sup>35</sup> Pilat gi, "Ngò gi, Yudaq byù nghut lhê lhú? Haú Náng é byù myí eq Náng é hkyangjong agyi pé sheq, Nang lé, ngá loq má ap byí é ru nghut lhê. Nang gi, haí kut é nghut lhê lhú?" ga dum myí ri.

<sup>36</sup> Haú hkûn, Yesuq gi, "Ngá é mingdán gi, mingkan shî eq a séng. Mingkan shî eq sêng é ru nghut le gi, haú Yudaq byu pé, Ngo lé a wó chyp yu lo shoq, Ngá é dui-nhâng zoshâng wuì, Ngo lé chôm hung yù kó râ nghut lhê. Nghut kôlhang, Ngá é mingdán gi, mingkan shî eq a sêng é ru nghut lhê." ga taí ri.

<sup>37</sup> Haú mù, Pilat gi, "Haú jáng, Nang gi, hkohkâm nghut bê lhú?" ga myí jáng, Yesuq gi, "Ngo lé, hkohkâm nghut lhê ga, nang taí nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haú tengmán hkyô lé saksé hkám râ matú, Ngò, mingkan htoq má jé lé é nghut lhê. Haú tengmán hkyô eq sêng é sù ó yuq le, Ngá é dang lé gyô ri." ga tû taí ri.

<sup>38</sup> Haú hkûn, Pilat gi, "Tengmán hkyô gâ é gi, haí jung lhú?" ga myí ri. Yhang gi, haú su ga myí luí, haú Yudaq byu pê chyáng dum htoq ê mù, "Shí yuq chyáng mara hûn râ hkyô, ngò a myàng nghut ri.

<sup>39</sup> Nghut kôlhang, haú Lhoqlhai Poí u lé, nungmoq é matú, ngò, htóng byû rayuq nhang htoq kat byi byi kut é htung, nungmoq wó akô. Haú mù, 'Yudaq byu pé é hkohkâm' lé, nhang htoq kat byi râ lé, nungmoq ô nau akô lhú?" ga myí ri.

<sup>40</sup> Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garû kat akô. Barabaq gi, damyaq nghut ri.

# 19

*Yesuq Lé, Tapzîng Má Jén Sat Râ Matú Doqđân É Hkyô*

*Mht 27:15-31; Mrk 15:6-20; Luk 23:13-25*

<sup>1</sup> Haû mù luî, Yesuq lé lêng she yù mù, nhuq bat râ matú, Pilat hkunmó hkyô ri.

<sup>2</sup> Haû gyezô pé gi, zujanmaú saî yù kôluî, Yesuq é ulhum má tsung byi kômù, Yhang lé, buhîng nè hut byî akô nghut ri.

<sup>3</sup> Hau htâng, yhangmoq gi, Yhâng chyáng dum huî ê ê kut luî, "Yudaq byu pé é hkohkâm ê! Chyung hîng xê hing nyî sháng gaq ô!" ga táî kômù, Yhâng é myoqdong má pyuq byî akô nghut ri.

<sup>4</sup> Pilat gi, haû Yudaq byu pé chyáng radàm dum htoq é mù, "Wú keq, shí yuq chyáng mara hûn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuî htoq lé byî lhê." ga tâî ri.

<sup>5</sup> Yesuq gi, haû zumuq tsûng tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga tâî ri.

<sup>6</sup> Haû hkyangjong agyi pé eq yhangmoq é no-  
qkuq yhûm zúng bang gi, Yhang lé myang kat kôjáng, "Yhang lé tapzîng má jén sat pyám aq!  
Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuî yù mù, tapzîng má jén sat keq. Ngò gi, Yhâng chyáng mara hûn râ hkyô a myàng." ga tú tâî ri.

<sup>7</sup> Haú hkûn, haû Yudaq byu pé gi, "Ngamoq chyáng tarâ rahkat joq lhê; tarâ haú dông ga jang, Yhang gi, shî gíng bê nghut ri; hkâsu mù gâ le,

Yhang gi, Garai Gasâng é Yhangzo haû nghut lê gâ ri." ga xoq taí akô.

<sup>8</sup> Pilat gi, dang haû lé wó gyo jáng, je gyô gyuq luí,

<sup>9</sup> yhúmkaû shut dum wang ló mù, Yesuq lé, "Nàng, hkâmâ é sù nghut lê lú?" ga myí ri. Nghut kôlhang, Yesuq gi, dang rahkun lhang a tû taí byi nghut ri.

<sup>10</sup> Haú hkûn, Pilat gi, "Nàng, ngo lé a tû taí kut lê lú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lú?" ga myí ri.

<sup>11</sup> Yesuq gi, "Nàng lé, haû ahtoq mai ahkáng byí e za a nghut le gi, nàng, Ngo lé haí kut râ a-tsam le wó râ a nghut. Haû mù luí, Ngo lé, náng é loq má ap byí é sù gi, mara je bo é nghut lê." ga tû taí ri.

<sup>12</sup> Haú hkûn mai, Pilat gi, Yesuq lé lhoq lhut kat byi nau nyí bê nghut ri. Nghut kôlhang, haû Yudaq byu pé gi, "Nàng, haú yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhumsing gùng lé, hkohkâm gâ é sù gi, hkoséng Kehtaq eq shai lhum é sù nghut lê." ga, ru jâng garû nyí bum akô nghut ri.

<sup>13</sup> Haû lé wó gyo jáng, Pilat gi, Yesuq lé shuí htoq ê mù, Hebre myíng dông Gabahta gâ é Luqgok hkâng myhang to jang nghu é jowò mâ é tarâ jéyáng tanghkuq má zung tô ri.

<sup>14</sup> Haú u gi, Lhoqlhai Poí é matú, Hên Lajâng é Buinyí nyí-káng raxe í hkyíng nghut ri.

Pilat gi, haû Yudaq byu pé lé, "Nungmoq é hkohkâm lé wú keq." ga taí ri.

15 Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haú hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lhú?" ga myi jáng, haú hkyangjong agyi pé gi, "Haú hkoséng Kehtaq mai lai luí, gotû hkohkâm ngamoq a wó." ga, tú taí akô nghut ri.

16 Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byí kat bê nghut ri. Haú mù luí, yhangmoq gi, Yesuq lé shuí ló bekô nghut ri.

*Tapzîng Má Jén Pyám É Hkyô*

*Mht 27:32-44; Mrk 15:21-32; Luk 23:26-43*

17 Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri.

18 Yhangmoq gi, haú má, Yesuq lé tapzîng htoq má jén tap pyám akô; Yhang eq rahá, gotû í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

19 Pilat le, masat laiká kê yù luí, haú tapzîng htoq má tap tô ri. Haú má gi, "YUDAQ BYU PÊ É HKOHKÂM, NAZARET WÀ BYÛ YESUQ" gâ tô ri.

20 Yesuq lé jén tô é jowò gi, myuq eq chyâng lhûm é htoq agó, haú masat laiká gi, Hebre dông le, Latin dông le, Grik dông le, kê tô é yanmai, haú Yudaq byu pé myo myo gi, masat laiká haú lé nghap bum akô nghut ri.

21 Haú Yudaq byu pê é hkyangjong agyi pé gi, Pilat lé, "'Yudaq byu pê é hkohkâm' nghú hkâká,

'Ngò gi, Yudaq byu pê é hkohkâm nghut lhê ga, Yhang taí ri.' nghû luí sheq ká aq." ga taí akô.

<sup>22</sup> Haú hkûn, Pilat gi, "Ngò kâ é dông, ngò kâ to bê nghut lhê." ga tû taí ri.

<sup>23</sup> Haú gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haú ahte bu lé le, gàm râ dâ akô; nghut kôlhang, haú gi, hkyupshi a bo e za, awang mai ahpyo hpyot kut woq tô é nghut ri.

<sup>24</sup> Haú mù, yhangmoq gi, "Bu shî lé gi, a lâng cheq e za, ó yuq myang yù ang râ laq, hkyîn shosé she wú sháng." ga, rayuq eq rayuq taí lhum akô.

Haú gi,

"Yhangmoq, Ngá é mebu lé chôm gam yù kó râ; Ngá é ahtê bû é matú, hkyîn shosé shê kó râ nghut lhê."<sup>☆</sup>

gâ é Chyúmdang lé lhoq dik râ matú dut é nghut lhê. Haú mù, gyezô pé gi, haú su kut bekô nghut ri.

<sup>25</sup> Haú Yesuq é tapzîng nàm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wà má é Mariq pé, yap tô bum akô.

<sup>26</sup> Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ánu ê\* nung zo lé wú aq." ga taí mù,

<sup>27</sup> chángzo haú lé le, "Náng nu lé wú aq." ga taí ri. Haú hkûn mai, chángzo haú yuq gi, Yesuq é yhângnu lé, yhâng é yhûm shut shuí ló bê nghut ri.

<sup>☆</sup> **19:24** Hkya-on 22:18 \* **19:26** Ánu ê, gâ é lé, Grik dông gi, "myiwe myhí ê" ga bo tô é nghut lhê.

*Yesuq Soqkâng Byit É Hkyô**Mht 27:45-56; Mrk 15:33-41; Luk 23:44-49*

<sup>28</sup> Hau htâng, Yesuq gi, ahkuî, muzó bàn bê nghut é lé sé luî, haû Chyúmdang lhoq dik râ matú, "Ngò, wuì shit ri." ga taí ri.

<sup>29</sup> Haú má, tsibiyiq wing chyîn rayambú joq tô ri; haû mù, yhangmoq gi, wuìmaù lé tsibiyiq wing chyîn haú má jum yù luî, jàm-yang ahpyo má tuî tap mù, Yhâng é nhutwuì jé shoq yhun byî akô nghut ri.

<sup>30</sup> Yesuq gi, tsibiyiq wing chyîn haú lé shuq yù mù, "Mù bàn bê." ga taí ri. Yhang, haû su ga taí eq yhang, ulhum nghuq ló mù, kâng byit bê nghut ri.

<sup>31</sup> Htang nyí gi, ahkyak é Bánno buinyì nghut luî, haú nyí gi, Hên Lajang Buinyì nghut ri. Haû mù, Yudaq byu pé gi, Bánno buinyì má, mâng pé lé tapzîng htoq má a joq to nhâng naù kô é yanmai, hkyî pé lé bat hkyuî pyám mù, mâng pé lé yù hkyô pyám nhâng râ matú, Pilat chyáng dúng tôngbán akô.

<sup>32</sup> Haû mù luî, gyezô pé gi, lé mù, Yesuq eq jén hui su nhik mâ é, rayuq é hkyî lé hí bat hkyuî pyám mù, rayuq é hkyî lé dum bat hkyuî pyám akô nghut ri.

<sup>33</sup> Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut é lé myàng kômù, Yhâng é hkyî lé a bat hkyuî byi kó nghut ri.

<sup>34</sup> Nghut kôlhang, gyezo rayuq gi, Yesuq é nam-cham má lham eq htaû kat byi jáng, radá dâm sui eq wuì yui htoq lo ri.

<sup>35</sup> Haû lé myàng é sù gi, saksé hkám byî ri; yhâng saksé hkâm é hkyô gi, tengmán ri. Haû yhang taí kyô é hkyô gi, têng é lé, yhang sé mù, nungmoq

le wó lumjǐng kó sháng gaq ga, saksé hkám byí é nghut ri.

<sup>36</sup> Haú hkyô pé dut é gi, "Yhâng é showui rahkat lháng a lhoq hkyui râ nghut lhê." ✧ gâ é Chyúmdang haú lhoq dik râ matú nghut lhê.

<sup>37</sup> Chyúmdang gotû ralhú má le, "Yhangmoq èq htau htông é sù lé, yhangmoq tu wú kó râ nghut lhê." ✧ gâ é bo tô ashí nghut ri.

*Yesuq Lé, Myhup Yhum É Hkyô*

*Mht 27:57-61; Mrk 15:42-47; Luk 23:50-56*

<sup>38</sup> Hau htâng, Yesuq é chángzo dut nyí é Aramahti myuq byú Yosep gi, haú Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat èq ahkáng byí kat jáng, yhang gi, gungsôm haú lé, lé yu ló bē nghut ri.

<sup>39</sup> Yhang gi, hí hkûn, myín lé, Yesuq lé ê huí é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê jói kô yu lé ri.

<sup>40</sup> Yhangnhik gi, Yesuq é gungsôm lé yù mù, Yudaq byu pé é mǎng yhum htúng eq rajung za, namngón jung eq rahá, pán yúng èq htup yup to byí akô.

<sup>41</sup> Haú Yesuq lé tapzǐng má jén sat pyâm é jowò nàm má, hkyâm ralhú joq ri; ó yuq lé le a lheq wú shí é, lup sik ralhú hkyâm hkaú má joq tô ri.

<sup>42</sup> Haú nyí gi, Yudaq byu pé é Hên Lajang Buinyì nghut é yanmai le, lup haú le chyâng é yanmai le, yhangnhik gi, Yesuq lé, haú má ê lheq tô akô nghut ri.



## 20

### *Lup Akôm*

*Mht 28:1-10; Mrk 16:1-8; Luk 24:1-12*

<sup>1</sup> Bánno buinyì htâng, napsûn noq le mau a bó shimá, Magadalaq wà mâ é Mariq gi, haû lup má é jé le, lup hkum mâ é luqlong huî hpyuq to láng é lé myang ri.

<sup>2</sup> Haû mù, yhang gi, Simun Petruq eq Yesuq chyitdap é chángzo góyuq chyáng din jé ló mù, "Haû Yhumsíng lé, lup mai yu htoq ló byuq bekô; hkâmá é kat to kô é lé, ngamoq a sé." ga taî ri.

<sup>3</sup> Haû mù, Petruq eq chángzo haû gi, lup shut e ló akô.

<sup>4</sup> Yhangnhik í yuq é din akô; nghut kôlhang, chángzo haû gi, Petruq htoq má wó dîn luî, lup má hí dîn jé e ri.

<sup>5</sup> Haû mù, yhang gi, ahkaû shut ngóm wú kat é hkûn, haû pán yúng htui leq tô é lé myang ri; nghut kôlhang, yhang gi, a wang ê nghut ri.

<sup>6</sup> Hau htâng, Simun Petruq gi, châng jé luî, lup hkaû shut wang e ri; haú hkûn, yhang gi, haú má pán yúng htui joq tô é lé le,

<sup>7</sup> haû Yesuq é ulhum má htup é panchoq lé le, myang ri. Panchoq haû gi, pán yúng htui eq rahá a nghut e za htuî jup leq tô ri.

<sup>8</sup> Haû lup má hí jé é chángzo le, ahkaû má wang é luî, myàng jáng, lumjíng bê nghut ri.

<sup>9</sup> (Yesuq gi, shí é mai dum dui toq lô râ nghut lhê ga bo tô é Chyúmdang lé, yhangnhik gi, a sé gyo shi kó nghut ri.)

<sup>10</sup> Hau htâng, haû chángzô nhik gi, yhûm taû ló bekô nghut ri.

*Magadalaq Wà Mâ É Mariq Lé, Yesuq Htoq Shit É Hkyô*

*Mrk 16:9-11*

<sup>11</sup> Nghut kôlhang, Mariq gi, lup shinggan má ngau yap tô ri. Yhang gi, ngaù uchyang lup hkaù má ngóm wú kat ri.

<sup>12</sup> Haù hkûn, yhang gi, Yesuq é gungsôm lhez tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

<sup>13</sup> Yhangnhik gi, "Myiwe myhí ê, nàng, haì mù ngau nyi lhê lhú?" ga myi kôjáng, yhang gi, "Ngá é Yhumsîng lé yù ló hpyuq kôluí, Yhang lé hkâmá ló lhez to kô é lé, ngò a sê é yanmai nghut lhê." ga tû taì ri.

<sup>14</sup> Haù su ga luí, yhang, lhing wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

<sup>15</sup> Yesuq gi, "Myiwe myhí ê, nàng, haì mù ngau nyi lhê lhú? Nàng gi, ó yuq lé ho wún lhê lhú?" ga myi jáng, yhang gi, hkyâm saí zo sù su ngam pyám mù, "Sarà ê, nàng, Yhang lé waq htot pyâm é nghut le gi, hkâmá ê lhez tô é, ngo lé taì kyo laq, ngò, Yhang lé yu ló râ." ga taì ri.

<sup>16</sup> Haù hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhîng mù, Hebre myíng dông, "Raboni!" ga wut kat ri. (Haù gi, "Sarà ê" gá é lichyúm nghut ri.)

<sup>17</sup> Yesuq gi, "Ngo lé hkâzáng shi; hkâsu mù gâ le, Ngò gi, haù Íwâ chyáng a taù doq ló shî é nghut lhê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é

Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.' gâ ri nghû, ló taí kyo aq." ga, yhang lé taí kat ri.

<sup>18</sup> Magadalaq wà mâ é Mariq gi, chángzô pé chyáng ló mù, "Yhumsîng lé, ngò myàng bê!" ga taí luí, yhang lé shit kat é pé lé, taí kyô ri.

*Yesuq, Yhâng É Chángzô Pé Lé Htoq Shit É Hkyô  
Mht 28:16-20; Mrk 16:14-18; Luk 24:36-49*

<sup>19</sup> Haú nyí, Bánno buinyì htang myìn lé, haú chángzô pé gi, Yudaq byu pé lé gyuq kô é yanmai, hkum tsing myhî pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyì sháng gaq!" ga taí ri.

<sup>20</sup> Yhang gi, haú su ga taí é htâng má, yhangmoq lé, Yhâng é loq pé eq namcham lé tân shit ri. Chángzô pé gi, haú Yhumsîng lé myàng kôjáng, gyai gabú bùm bekô nghut ri.

<sup>21</sup> Yesuq gi, "Nungmoq nguingón yuqyo nyì sháng gaq! Haú Íwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê." ga dum taí ri.

<sup>22</sup> Haú su ga taí mù, Yhang gi, yhangmoq é ahtoq má soq mut luí, "Haú Chyoiyúng Woi-nyí lé hap yù keq.

<sup>23</sup> Ó yuq é mara pé lé nghut kôle, nungmoq hkyut byí é nghut jáng, mara haú pé gi, hkyut pyám byí é hui râ nghut lhê; nungmoq a hkyut byí é nghut jáng, mara haú pé gi, hkyut pyâm é hui râ a nghut." ga taí ri.

*Htomaq Lé, Yesuq Htoq Shit É Hkyô*

24 Haû chángzo raxe í yuq má bo é, Zozûm le gâ é Htomaq gi, Yesuq lé jé é hkûn, haû chángzô pé eq rahá a nyi to nghut ri.

25 Haû mù luî, gotû chángzô pé gi, yhang lé, "Haû Yhumsîng lé, ngamoq myàng bê." ga tâi kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé má é shamtoq zuhkô lé myàng mù, ngá é loqnyhuî èq joí wú é eq, Yhâng é namcham má, ngá é loq èq myang lap wú é za a nghut jáng, haû lé ngò lumjîng râ a nghut." ga tâi ri.

26 Rabat myáng jáng, chángzô pé gi, haû yhûmhkaû má dum nyi tô akô; Htomaq le, yhangmoq eq rahá nghut nyi ri. Haû hkum pé myhî to kôlhang, Yesuq gi, lé jé mù, yhangmoq é agùng má yap to luî, "Nungmoq nguîngón yuqyo nyi sháng gaq!" ga tâi ri.

27 Hau htâng, Yhang gi, Htomaq lé, "Náng é loqnyhui, shî má lé joí mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyi aq." ga tâi ri.

28 Haú hkûn, Htomaq gi, "Ngá é Yhumsîng, ngá é Garai Gasang ê!" ga Yhang lé tâi ri.

29 Yesuq gi, yhang lé, "Nàng gi, Ngo lé myang é yanmai, lumjîng é a nghut lhú? A myàng kôlhang, lumjîng é bang gi, hkungsô wó nyi ri." ga tâi ri.

30 Laiká buk shî má a kê tô é limik kumlhá pé gotû myo myo lé le, Yesuq gi, Yhâng é chángzô pé hí má kut shit bê nghut ri.

31 Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjîng râ matú eq, lumjîng é yanmai, nungmoq

Yhâng é myìng má asak wó kó râ matú, shí hkyô pé lé kê tô é nghut lhê.

## 21

### *Ngozo Wó Chyup Yu É Limik Kumlhá*

<sup>1</sup> Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mâ é đông nghut ri.

<sup>2</sup> Simun Petruq, Zozûm le gâ é Htomaq, Galile mau Hkanaq và mó mâ é Nahtanelaq, Zebedi é yhangzo nhik eq gotû chángzo í yuq pé gi, rahá nyì to bum akô.

<sup>3</sup> Haú hkûn, Simun Petruq gi, yhangmoq lé, "Ngò gi, ngozo kóng ê râ." ga taí jáng, yhangmoq gi, "Ngamoq le châng lé râ." ga taí akô. Haú mù luí, yhangmoq gi, htoq ê mù, haú lhai má wàng bekô nghut ri; nghut kôlhang, haú myîn, radu lhang a wó kóng kó nghut ri.

<sup>4</sup> Htang napkyó maubó lo é hkûn, Yesuq gi, wuyàm má yap tô ri; nghut kôlhang, haú chángzô pé gi, Yesuq nghut é lé a wú sé kó nghut ri.

<sup>5</sup> Yesuq gi, yhangmoq lé, "Luzúm wuì ê, nungmoq, ngozo wó akô lhu?" ga, wut myi kat jáng, yhangmoq gi, "A wó." ga tû taí akô.

<sup>6</sup> Haú hkûn, Yhang gi, "Nungmoq é gùn lé, haú lhai é loqyo hkyam shut dú hkyô kat keq; haú jáng, nungmoq wó kông yù kó râ nghut lhê." ga taí ri. Haú mù, yhangmoq gi, gùn dú hkyô kat é hkûn, ngozo lùm myó é yanmai, haú gùn lé lhang a wó llang yù lo kó nghut ri.

<sup>7</sup> Haú mù luí, haú Yesuq chyitdap é chángzô gi, Petruq lé, "Yhumsîng ru nghut ri." ga taí ri. Simun

Petruq gi, "Yhumsîng ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhîng mó lé, yhâng é gùng má baíyup yù mù, wui hkaû má byam wang ló bê nghut ri.

<sup>8</sup> Haû chángzo góbang gi, wuiyàm eq ngo xê làm kô za wê é yanmai, ngozo byíng tô é gùn lé, wuiyàm shut lhaî mai she jé lo akô nghut ri.

<sup>9</sup> Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk ratsuí joq tô é lé le, myang akô.

<sup>10</sup> Yesuq gi, yhangmoq lé, "Haû, ahkuî za nungmoq wó kông yu é ngozo, ra-am yù lé keq." ga taî ri.

<sup>11</sup> Haû mù, Simun Petruq gi, lhaî má doq ji luî, kô é ngozo rasho ngó xe sùm du yhang bo é gùn lé, dùng yàm má she htoq tô ri. Ngozo haû myhó myo kôlhang, gùn gi, a jeq nghut ri.

<sup>12</sup> Yesuq gi, yhangmoq lé, "Napzang lé zo keq." ga taî ri. Chángzô pé gi, Yhang, haû Yhumsîng nghut é lé sé kô é yanmai, ó yuq lháng, "Nàng, ó yuq nghut lhê?" ga, a wám myi kó nghut ri.

<sup>13</sup> Yesuq gi, lé mù, muk lé ê yù luî, yhangmoq lé byî ri; ngozo lé le, haû su kut ri.

<sup>14</sup> Yesuq gi, shi é mai lhoq dui toq yû huî é htâng, Yhâng é chángzô pé lé htoq shit é má, shî gi, sum dâm nghû râ dâm nghut ri.

### *Yesuq Eq Petruq*

<sup>15</sup> Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lhú?" ga myi jáng, yhang gi, "Nghut lhê; Yhumsîng ê, ngò, Nàng lé chyitdap é hkyô lé, Nàng sê lhê." ga

tû taî ri. Haú hkûn, Yesuq gi, "Ngá é sau zô pé lé, baú aq." ga, yhang lé taî ri.

16 Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lhú?" ga dum myi jáng, yhang gi, "Nghut lhê; Yhumsîng ê, ngò, Nàng lé chyitdap é hkyô lé, Nàng sê lhê." ga tû taî ri. Haú hkûn, Yesuq gi, "Ngá é sau pé lé, rém aq." ga taî ri.

17 Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhê lhú?" ga myî ri.

Haú hkûn, Petruq gi, "Nàng gi, ngo lé chyitdap lhê lhú?" ga, yhang lé Yesuq èq sùm dam dàt taí é yanmai, yhâng myit nò luí, "Yhumsîng ê, Nàng gi, lhunglhang lé sê lhê; ngò, Nàng lé chyitdap é hkyô lé, Nàng sê lhê." ga taî ri.

Haú hkûn, Yesuq gi, "Ngá é sau pé lé, baú aq.

18 Ngò, nàng lé teng za taí lé, nàng, zorâm nghut é hkûn gi, yhumsîng gùng yhumsîng hpyihit baíyup\* yù mù, ê nau é jowò hkangmó má wó é é nghut lhê; nghut kôlhang, nàng mang jáng gi, loq í loq lham luí, nang lé góyuq èq hpyihit baíyup byi mù, nàng a é nau é jowò shut shuí ê râ nghut lhê." ga taî ri.

19 (Yesuq haú su ga taí é gi, haú Petruq, hkâsu kut shi é dông mai, Garai Gasâng é hpungwup shing kang lé dan hu nhâng râ nghut é lé, taí nau é nghut ri.) Hau htâng, Yesuq gi, yhang lé, "Ngá htâng cháng aq." ga taî ri.

20 Haú hkûn, Petruq gi, lhîng wú kat le, haú Yesuq chyitdap é chángzo, yhangmoq htâng châng

\* 21:18 *Hpyihit baíyup* gâ é lichyúm gi, mebu wut luí ri ri kut tô é lé gâ lhê.

wún é lé myàng ri. Chángzo haú gi, hí hkûn, myin-zang zô é u lé, Yesuq chyáng leq ngè mù, "Yhumsîng ê, Nang lé ap pyám râ sù gi, ó yuq lhú?" ga, myi wú é sù nghut ri.

<sup>21</sup> Petruq gi, haú yuq lé myàng jáng, Yesuq lé, "Yhumsîng ê, shí yuq gi, hkâsu dut râ lhú?" ga myi ri.

<sup>22</sup> Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lê lhú? Nàng gi, Ngá htâng cháng aq." ga tû taí ri.

<sup>23</sup> Dang hau é yanmai, chángzo haú yuq a shî râ nghut lê gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shî râ hkyô lé taí é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lê lhú?" ga, taí é ru nghut lê.

<sup>24</sup> Shí pé lé saksé hkám mù, shí pé lé kê tô é sù gi, chángzo haú yuq nghut lê. Yhâng é saksé gi, têng é lé, ngamoq sê lê.

<sup>25</sup> Yesuq gi, gotû muzó myo myo le kut ashî nghut ri. Muzó haú pé lhum Jup lé, kê htoq yu é ru nghut le gi, kê tô é laiká buk haú pé gi, mingkan gón má lhang ngo râ a nghut nghû, ngò wó myit ri.



# **Chyoiyúng chyumlaiká: dangshikaq asik; Zaiwa**

## **New Testament in Zaiwa**

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

### **The New Testament**

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

23f9fc55-a8a4-59ef-9513-707ec336b0ee